

M354: Die Lilie (Versteil)

- 10,7 si blendent die ougen der armer süntære .
10,8 daz si van ire sünden niet en mügen gekêren .
10,9 alse si lobent die bôsheit .
10,10 die âne zwîvel zuo der hellen geit .
10,11 dâr umbe müezen si zweivaltige pîne haben .
10,12 vüre sich selben . inde vüre anderere liute missetât .
10,13 alhier sprich van den spottæren
10,14 nû kumen wir an die spottære .
10,15 die sich an niemannes wort en willent kêren .
10,16 noch si ne willent engeine sünde haben getân .
10,17 sôwaz si mit spotte habent missetân .
10,18 den spottære muoz ich widertrîben .
10,19 daz hê behalten müge belîben .
10,20 inde den ungezogenen willen wir die selbe lêrunge geben .
10,21 daz si beide mügen haben daz êwige leben .
10,22 die unkusche . inde die spotlîche wort kument van tumben sinnen .
10,23 want sich die armen niet en bekennent noch en versinnent .
10,24 sage mir tumbe mennische . weist dû waz dû sîs . wâ dû sîs . waz dîn
gewerden sule .
10,25 ich willen ez dich eines teiles lêren .
10,26 dû bis ein kranc vaz vol unreinicheite .
10,27 des maht dû dich selben wole bescheiden .
10,28 dû en bis engeines dinges gewis wan des tôdes .
10,29 sô dû doch der stunten überein niet en wizzes .
10,30 dû en weist obe dû iezuo lebes .
10,31 inde obe dû mit rehteme urteile in die êwige helle geworfen werdes .
10,32 dâ müezes dû wîs werden an den pînen .
10,33 âne bis dû hier tump an den sünden .
10,34 dîn leben iz is leider angestlich .
10,35 want dîne sünde . inde dîne pînen mêrent sich .
10,36 dit en wære niet sô guot alse dê gæhelîche tôt .
10,37 want sô würde doch minnere dîne nôt .
- 11,1 nû merke rehte wâ dû sîs .
11,2 teis dû daz . sô wirdes dû wîs .
11,3 dû bis in deme angestlîcheme graben der træne .
11,4 dâ dû dich en salt engeiner sicherheit verwænen .
11,5 der stricke der bekorungen is alsô vile . inde noch mêr .

11,6 wan des stüppes in der sunnen vare .
 11,7 tuo ûf daz herze inde sich ûfwert
 11,8 ich wænen dîn spot hê geit hinderwert .
 11,9 dâ vindes dû den angestlichen rihtære alzehant .
 11,10 hê hât daz scharpfe swert in sîner hant .
 11,11 hê en læzet engeine sünden ungewrochen .
 11,12 si sîn gedâht . getân . obe gesprochen .
 11,13 dû muost her vüre . ganc here vort
 11,14 zelle dîne schantlîche inde die spotlîche wort .
 11,15 dâ muost dû dîner boeser worte ein ende vinden .
 11,16 dâ dû en maht noch wîchen noch winden .
 11,17 dâr nâh sich . under dich . inde begrîf . daz hellische apgründe .
 11,18 dâ dû die niunslahte pînen salt vinden .
 11,19 die êrste is daz viur . daz niemer en erküelet .
 11,20 daz ander is die keltene die niemer en erwarmet .
 11,21 dâr nâh is dê wurm untôtlich .
 11,22 inde dê stanc sô unvertragelich .
 11,23 dâr nâh die vinsternisse die man sal tasten .
 11,24 inde die hemere die slânt âne raste .
 11,25 dâr nâh die bende swâr inde viuric .
 11,26 inde der tiuvel swarz inde alze vreislich .
 11,27 dâr nâh kumet die schemede .
 11,28 want dâ en is noch der roc . noch daz hemedede .
 11,29 dâr nâh merke tûsentwarp tûsent ungemach .
 11,30 die engeine zunge gezellen en mac
 11,31 kêre dich danne umbe inde sich hinder dich .
 11,32 inde merke wie dû gelebet hâs unnützelîche .
 11,33 sich alle die zît die dû van kinde hâs vertân .
 11,34 weiz got die rechenunge en mac dich niet vergân .
 11,35 eine stunte en wirdet dir niet vergeben .
 11,36 alsô kurz alse dû dîn ouge mohtes ûf geheben .
 11,37 sich dâr nâh vüre dich . inde merke mit sinnen
 11,38 manic hindernisse daz dû noch muost verwinnen .

12,1 salt dû hier leben mit dîneme vromen .
 12,2 alsô daz dû zuo deme himele müges kumen .
 12,3 allez dîn leben is vol bekorungen .
 12,4 dâr umbe betwinc daz vergebnisse der zungen .
 12,5 wende dich nû zuo der rechter hant
 12,6 dâ vindes dû dînen engel alzehant .
 12,7 unvrô stânte mit eineme îtelen buoche .
 12,8 want dû nie hattest der guoter werke engeine ruoche .
 12,9 die an deme buoche solten geschriben stân .
 12,10 obe dû si hettest alse dû soltest getân .
 12,11 sich zuo der lerzer hant wâ dîn vîant steit .
 12,12 mit eineme vollen buoche vrô inde gemeit .
 12,13 in deme buoche steint alle dîne sünden .
 12,14 van der zît daz dû begundes sünden .

12,15 vile einicliche geschriben .
 12,16 der en is überal engeine ungebrievet beliben .
 12,17 inte bis dû noch niet zuo der vorhten erwecket .
 12,18 sô bis dû an deme tôde gestrecket .
 12,19 entwache noch inde lâz die boese wort varen .
 12,20 daz dû deme angestliche worte müges entwaren .
 12,21 daz got zuo den ungerechten sprechen sal .
 12,22 “geit vermaledieten in der êwiger hellen tal .
 12,23 in daz viur daz deme tiuvele is bereit .
 12,24 inde eineme iewelicheme dê sîne wege geit .”
 12,25 vliuh hinne inde île zuo der kameren .
 12,26 dâ blüejent die liljen mit den grünen blateren .
 12,27 alhier sprich van den worten
 12,28 waz bezeichnenet nû daz der liljen blateren .
 12,29 der is nidene mêr . inde si sint mêre danne dâ obene .
 12,30 wir haben gesprochen daz dê stil is der guote wille .
 12,31 sô is des stiles niderste teil . des willen – aneginne .
 12,32 sô is daz oberste teil . des guoten willen ende .
 12,33 her nâh sulen wir merken . inde bekennen .
 12,34 daz in deme aneginne des guoten willen .
 12,35 nochdan en mac man die wort nicht betwingen .
 12,36 noch mit sô grôzer mâzen gesprochen .
 12,37 in en gebreche beide an der zuht . inde an der rechter zalen .

13,1 vile blateren bezeichnenent vile worte .
 13,2 inde unbesnitene obe unzûchtige wort .
 13,3 werden mit den grôzen blateren bezeichent .
 13,4 wir werden dises allen tac geware .
 13,5 daz sich guote liute niet en kunnen bewaren .
 13,6 si en müezen under stunten eteswaz sprechen .
 13,7 dâ in der mâzen obe der zûhte müeze gebrechen .
 13,8 wan sôwê sich an sînen worten wole behüeten kan .
 13,9 dê is also Jacobus sprichet ein vollekomen man .
 13,10 hê is an deme stile ze oberst an die bluomen kumen .
 13,11 an deme alle liute hoerent iren vrûmen .
 13,12 die wort eines mannes dê alsus vollekomen is .
 13,13 bezeichnenent die blateren alze oberst des stiles
 13,14 der is lützel inde si sint dâr zuo kleine .
 13,15 want sîner worte is lützel . inde si sint hōvisch inde reine .
 13,16 ich wænen daz dê prophête alsus verre was brâht .
 13,17 dê dâ sprach “ich haben mînen munde eine huote gesazt
 13,18 daz ich bin also ein stumme worden .
 13,19 daz ich niet unmüezic en werde an den worten .”
 13,20 alhier sprich van deme swîgenne
 13,21 hier sal man merken daz dê selbe man dise mâze bat .
 13,22 den dê allen dîngen habet mâze gesazt .
 13,23 hê sprach “hêrre got setze eine huote über mînen munt .
 13,24 daz nieman van mînen worten werde wunt”

13,25 dise mâze hielt unse süeze meister inde unse hêrre .
13,26 want hê tete selbe nâh sîner lêre .
13,27 hê hatte dâ vore mit des wîsen mannes munde gesprochen .
13,28 “an vile worten en mac sünden niet gebrechen”
13,29 dâr umbe was hê an allen sînen worten zühtic inde kurz .
13,30 also iz allen heiligen liuten ze tuonne gebüret .
13,31 dit maht dû allerbezzist merken an sîner martiljen .
13,32 dâ die rôte rôse lêrte die wîze liljen .
13,33 wilt dû vlîzlîche hoeren wie dê evangelista sprichet .
13,34 ich wænen daz dir dîn herze brichet .
13,35 dô dê süeze Jêsus stuont vore deme bischove der jûden .
13,36 hê begunde in vrâgen mit maniger reden .
13,37 dê süeze gebundene Jêsus hê ne gap ime engeine antwerte .
13,38 alsô daz es si alle wunderte .

14,1 die valsche geziuge si sprâchen wider in sêre
14,2 wane daz süeze lamp stuont also iz toup wære .
14,3 iz stuont also ein stumme inde sweic .
14,4 durch mîne minne jâmerlîche inde bleich .
14,5 daz êwelîche wort iz en sprichet niet .
14,6 merket alle geloubigen inde siet .
14,7 hê is stum dê aleine sprechen kan .
14,8 hê swîget also ein schuldic inde ein vertwâset man .
14,9 ze lezzest dô hê doch solte inde wolte sprechen .
14,10 mit vile kurzen worten wolte hê sîne stille brechen .
14,11 mit kurzen worten sprach hê die wârheit .
14,12 volget ime sîne liljen als hê iuch hât geleit .
14,13 setzet iuwere zungen in alsô getâne huote .
14,14 verwinnet mit swîgenne der boesere ungemüete .
14,15 iz en is engein dinc lîhtere danne daz si swîgent .
14,16 den dere herze in senftmüeticheite ligent .
14,17 ein ander swîgen is daz kumet van grôzeme zorne .
14,18 dâ die boese herzen ligent in des ungemüetes dorne .
14,19 in wære michel bezzere daz si sprâchen .
14,20 danne si sich an in selben alsô harte wræchen .
14,21 dâr umbe dê sprechen sal hê spreche gezogenlîche
14,22 dê swîget . hê swîge verdulticlîche .
14,23 hâs dû guote wort inde guot gemüete in beiden sîten .
14,24 sô maht dû beide swîgen inde sprechen wole geliden .
14,25 ich willen süeze sêle . daz dû Jêsum in dîn herze leges .
14,26 Jêsum den süezen den dû sô senfte treges
14,27 alsô also hê dô sweic inde niet en sprach .
14,28 dô hê also ein stumme deme valscheme urkünde underlac
14,29 lerne vertragen mit Jêsus . iz gip ime grôzen danc .
14,30 daz hê die valsche urkünde allerêrst durh dînen willen transc .
14,31 liuget man ûf dich durch sînen wille .
14,32 vrôuwe dich sêre inde swîch eckers al stille
14,33 dîn swîgen is dîner vîande martilje .

- 14,34 inte dû salt dâr abe blüejēn alse die lilje .
14,35 di sælicheit is dir in teil getân .
14,36 die hē den sīnen gelobete . mit worten sus getân .
- 15,1 “ir sulet sælic sīn alse iuch die liute sulen hazzen .
15,2 inde durch mīnen willen sulen iuch verwâzen .
15,3 vrōuwet iuch sprechen ich inde sīt vrō .
15,4 want iuwer lōn sal grōz sīn inde hōh .”
15,5 an dit gelūbede salt dû dīn herze hangen .
15,6 dich sal nāh deme lōne verdulticlīche verlangen .
15,7 dē gelobære hē is wārhaftic .
15,8 hē is mehtic . rīche . inde willic .
15,9 dīn schōz hē sī ecker wīt inde gereit .
15,10 hē sal dir gevūllet werden . sweme liep obe leit .
15,11 mūgen dich dīner vīande zungen here zuo bereit gemachen .
15,12 en salt dû danne niet vrō sīn inde van herzen lachen .
15,13 si en wizzen des niet wie sēre si dir vrument .
15,14 ein iewelich wort sal alse eine gimme zuo dīner krōnen kumen .
15,15 ich wānen alse dû tragente wirdes die krōne der ēren .
15,16 dû woltes daz der worte mēr gewesen wære .
15,17 daz golt diser krōnen sal dīne stille wesen .
15,18 daz silber sulen dīne guote wort geben .
15,19 des goldes sal vile sīn des silberes sal gebrechen .
15,20 want dû salt michel mēr swīgen . danne sprechen .
15,21 nū sich wie manigen stein dû willes in diser krōnen tragen .
15,22 alsō manic scheltwort mūezes dû hier vertragen .
15,23 dit silber inde dit golt inde dise gesteine .
15,24 si sint vile verre van einander gescheiden .
15,25 sulen wir si vaste zesamene brengen
15,26 ich wānen daz viur der minnen sal den oven entvengen .
15,27 dīn verdultic herze sal der oven wesen .
15,28 dā inne mac daz sūeze viur wole weren .
15,29 dē smit diser krōnen is . der heilige geist .
15,30 hē smidet mit deme hamere des widermüetes allermeist .
15,31 en vorhte den hamer niet alsō sēre
15,32 want hē hāt die münze dīnes sūezen hēren .
15,33 dû salt den blāsebalc die gunst des heiligen geistes vernemen .
15,34 dē dir sal den starken wint der guoter andæhte geben .
15,35 alse der wint der guoter andāht . dit viur der minnen beweget .
15,36 sō – si daz si rehte lebet .
15,37 dû en salt disen wīsen smit durch sīnen harten hameren niet begeben .
15,38 wilt dû van deme geiste geistelīche leben .
- 16,1 sich ecker daz dû habes den anevalz der verdulticheite .
16,2 sō maht dû den hamer entvāhen mit sicherheite .
16,3 ich bin verre ūzer der materjen getreten .
16,4 die minne vertruoc mich . dû muost mir ez vergeben .
16,5 wane dô ich die zūhtige wort . inde die stille loben wolte .

- 16,6 ich wænen daz ich ireme lône ze rehte volgen solte .
 16,7 alhier sprich van den swilen der stolzicheite
 16,8 nû willen wir uns wider an unse rede wenden .
 16,9 inde sien wie der liljen blaterie die grôze swilen verschwenden .
 16,10 die swilen sint die stolze gemüete .
 16,11 dâ inne loschet daz eiter der untugende .
 16,12 nû sien wir . wie man si müge brechen .
 16,13 waz worte man zuo den geswalten gemuoten sule sprechen .
 16,14 alle die stolzen inde die zornige liute .
 16,15 habent alle gewollene inde getrundene gemüete .
 16,16 van der gireden is ouch daz herze geswollen .
 16,17 daz engein rîchetuom en mac ervollen .
 16,18 sich obe dise blaterie sîn it sêre lobelich .
 16,19 die dise swilen heilent alsus tâtlich .
 16,20 ein tâtlich swære is die stolzheit
 16,21 die der sêlen den tât ane teit .
 16,22 nû sien wir wie man den müge vertriben .
 16,23 van dere sicherere sêlen lîbe .
 16,24 dit sien wir allerbezzist an deme meistere der ôtmüetigheite .
 16,25 obe wir willen volgen sînem guoten geleite .
 16,26 hoere wie hê sîne jungere lêrte .
 16,27 dô si die swære der stolzheite beswærete .
 16,28 “man pfliget des in der werelte sêre .
 16,29 daz man den künigen biutet hêre .
 16,30 inde si heizent die woletætlic .
 16,31 die über si sint gewaltic .
 16,32 iz en sal under iuch niet wesen hôh . hê sî iuch allen zuo dienenne gereit .
 16,33 sô mac in erheben sîne – ôtmüetigheit .
 16,34 also des mennischen sun en is niet kumen dienest ze nemenne .
 16,35 wan anderen liuten dienest ze gebenne .
 16,36 want also ir selbe müget prüeven .
 16,37 wie ich mich under iuch an deme dieneste üeben .”
 16,38 dise wort gap hê sînen jungeren dê sîeze lêrære .
 16,39 also dê ûf eine swile leget der liljen blaterie .
- 17,1 siet wie grôze maht hatten dise blaterie .
 17,2 die die stolzheit vertriben alsô sêre .
 17,3 van den herzen der guoter jungere
 17,4 inde leitten si in den wec den si lêrte .
 17,5 ire sîeze meister inde ire hêre .
 17,6 dise blaterie sal dê gerechte mennische haben .
 17,7 mit den hê die siechen müge laben .
 17,8 inde gewinnen den die ôtmüetigheit
 17,9 die beswæret sint van der stolzheit
 17,10 diser blaterie maht dû vile gewinnen .
 17,11 wilt dû die heilige schrift vernemen mit sinnen .
 17,12 namelîche daz evangelium
 17,13 dâ dû vindes den ôtmüetigen Jêsum .

- 17,14 die sich ôtmüetigte bizzo an den tô .
17,15 daz hê dir benæme des tôdes nô .
17,16 iz is der erden vile schamelich
17,17 alse si erkennet got alsô ôtmüetic .
17,18 dû en mohtes niet genesen wan mit gotes ôtmüetigheit .
17,19 ware wilt dû danne gevaren mit dînere stolzheit .
17,20 wie wilt dû stolz kumen zuo deme rîche .
17,21 dannen der stolze engel muoste entwîchen .
17,22 sich wie swâr die stolzheit sî .
17,23 die in deme vasten himele niet en mohte wesen vrî .
17,24 si muoste durch den starken himel vallen .
17,25 in daz apgründe . mit iren volgæren allen .
17,26 den wec dê dar widere dich mac geleiten .
17,27 den en maht dû niet behalten . danne mit der ôtmüetigheite .
17,28 eine kurze lêrunge is daz .
17,29 die ôtmüetigheit klimbet in der stolzheite . stat .
17,30 die stolzheit sal genidert werden .
17,31 bizzo an den brinnenten grunt der erden .
17,32 wes erhebes dû dich erde inde asche .
17,33 wie hâs dû dînes aneginnes inde dînes endes vergezzen .
17,34 gedenke waz dû wæres . inde waz dû sules geworden .
17,35 inde erhebe dich danne nâh dîneme werde
17,36 ich wænen daz iht wirre tage ergein nâh dînem tôde .
17,37 die dich nû erhebet die sient dich danne vile nôte .
- 18,1 dînes selbes urteil wirdet danne geendet über dich .
18,2 vile arm mennische wes erhüebes dû dich .
18,3 “wâ is mîn guot inde wâ is mîn erbe .
18,4 ô wê wie ungetriuwe sint mir mîne erben .
18,5 wâ is mîn vleisch des ich sô wole pflac .
18,6 deme ich en tete engein ungemach .
18,7 ô wê wie is iz den wûrmen in teil getân .
18,8 ô wê sîner schoenheite die alsus solte ergân .”
18,9 dise klage si wirdet leider alze spâte .
18,10 dâr umbe alse man die zît hât sô volget râte .
18,11 inde gesinnet . inde vindet genâde .
18,12 aldus getâne blatere sal man ûf die gewollene herzen breiten .
18,13 daz si brechen inde verliesen den wint der stolzheite .
18,14 alhier sprich van deme zorne
18,15 ein ander angestlich swile heizet der zorn .
18,16 die is in des tumben mennischen herzen ein müelich dorn .
18,17 want alse dê wîse man sprichet .
18,18 dê zorn in des tumben herzen stichet .
18,19 dis dorn en læzet niemanne engeine raste haben .
18,20 dê sælige dê in wole ûz mohte gegraben .
18,21 here zuo is ouch nütze der liljen blat .
18,22 obe iz ûf die swile rehte wirdet gelaht .
18,23 wir kêren uns aber an den spiegel aller tugende .

- 18,24 inde sien wie hê sîne wort here zuo vüegeete .
18,25 dê süeze Jêsus quam eines in eine stat .
18,26 dâ hê alze vergebenes herberge bat .
18,27 maht dû dit âne riuwe in dîneme herzen verbergen .
18,28 dô dê arme Jêsus niet en mohte geherbergen .
18,29 erbarme dich noch über den armen gengelære .
18,30 sô wirdet noch vroelich sîn herberge .
18,31 hê nimet die herberge noch gernere danne dû .
18,32 hê suochet noch wâ sîn houbet müge haben ruowe .
18,33 hê willt ecker dîn herze haben .
18,34 dâ inne maht dû in wermen inde laben .
18,35 des ime die boese liute niet en gunden .
18,36 want si der güete an in selben niet en vunt .
18,37 des wurden erzürnet die jungere .
18,38 inde sprâchen ane den süezen hêre .
- 19,1 “wilt dû wir sprechen deme himelische viure .
19,2 daz iz verzere dise boese gebûre .”
19,3 dise wort wâren des zornes ein zeichen .
19,4 den dê guote meister wolte beweichen .
19,5 hê sprach “ich en weiz waz geistes in iuch lebet .
19,6 dê iuwer gemüete alsus beweget .
19,7 ir sulet wizen daz ich kumen bin .
19,8 niet durch iemannes verlust wan umbe gewin .
19,9 inde daz ich die suoche inde heile
19,10 die deme vîande wâren worden ze teile .”
19,11 dit was ein guot liljen blat .
19,12 ûf sîner jungere zorn lahte hê daz .
19,13 inde brach die swile dâr mite .
19,14 inde sazte ire herzen in senften vride .
19,15 ich willen dir ein ander blat wîsen .
19,16 daz muost dû inde salt van rehte prîsen .
19,17 daz dê süeze Jêsus sprach dô hê vertruoc .
19,18 den boesen schalc dê in zuo sînen backen sluoc .
19,19 ein untîure schalc sluoc den küninc van himelrîche .
19,20 sich waz jâmers diseme müge gelîchen .
19,21 hette in doch ein gewaltic mennische geslagen .
19,22 mîn herze mohte iz deste baz vertragen .
19,23 wan dê süeze hêre vertruoc iz baz danne ich .
19,24 want hê was van herzen senftmüetic . inde verdultic .
19,25 daz vernim an sîner antwürte .
19,26 die zuo sîneme herzen rehte gehôrte .
19,27 hê sprach “beziugest mich hân ich übele gesprochen .
19,28 sô sprechen ich wole . wâr umbe hâs dû dich an mir gewrochen .”
19,29 entbarmet iuch alle die ôren habent .
19,30 alle die einige minne zuo der minnen tragent .
19,31 lâzet dit wort iuweren zorn zerbrechen .
19,32 sôwanne ir iuch an iemanne willet wrechen .

- 19,33 dê sich wrechen mohte wole mit rehte .
19,34 hê liez sich ungewrochen an eineme boeseme knehte .
19,35 alsus getâne wort brechen des zornes swile .
19,36 dû maht dere lesen an deme süezeme Jêsu vile .
19,37 an der ein willen wir uns noch kêren .
19,38 daz hê sprach an deme kriuze vûre sîne kriuzigære .
- 20,1 hoere merke . inde behalt waz hê sprach
20,2 dô hê leit daz tâtlich ungemach .
20,3 dô in die nagele sêre bunden .
20,4 an sînen vieren jâmerlîchen wunden .
20,5 hê sprach “vater vergip iz disen die mich martelen .
20,6 want si ne wizen niet daz si süntigent .”
20,7 dit is ein blat daz über alle blateren geit .
20,8 dit blat treget die volle heilicheit .
20,9 dîn herze is alze unbereit .
20,10 deme dit wort in daz herze niet en geit .
20,11 wider allen zorn inde al ungemüete .
20,12 sô mac dit blat zounen sîne güete .
20,13 lege iz in dîn herze inde halt iz sêre .
20,14 daz dê süeze Jêsus bat vûre sîne kriuzigære .
20,15 want si selbe niet en bekanten
20,16 wie grôze sünde si an sich wanden .
20,17 dû salt wizen alse dir ieman übele teit .
20,18 wiste hê waz pînen nâh den sünden geit .
20,19 inde hette hê sich ze einem mâle besuoht .
20,20 hê en sprâche noch en tâte dir niemer niet danne guot .
20,21 want daz sprechet dê süeze Jêsus wêrlîche .
20,22 sôwê sîneme ebenkristene “affe” sprichet .
20,23 hê is des hellischen viures schuldic .
20,24 her nâh berihte sich ein iewelich . inde lâze sînen zorn varen .
20,25 willt hê sîne sêle bewaren .
20,26 hê lerne ouch sô süeze wort sprechen .
20,27 daz hê eines anderen zorn müge zerbrechen .
20,28 hê bite ouch vûre die in habent erolgen .
20,29 willt hê des süezen Jêsus lêrungen volgen .
20,30 inde neme in sînen herze daz iz in kumet van tumbenheite .
20,31 die ime tuont obe sprechent leide .
20,32 want si sich van der hellen niet en willent scheiden .
20,33 dâ der zorn hine leitet .
20,34 alhier sprich van der gireden
20,35 die dritte swile is die leide girheit .
20,36 dere vile nâhe engein mennische entgeit .
20,37 si hât bevangen – allez ertrîche .
20,38 ich en weiz engeine ire gelîche .
- 21,1 want iz en is nieman hê en wille rîche sîn
21,2 man . inde wîp . die alten inde die kleine kindelîn .

- 21,3 alle willent si daz guot haben .
 21,4 van der wigen bizze zuo deme grabe .
 21,5 inde die mâze sazte hê ime kûme ie einic man .
 21,6 dê guotes ie einic teil gewan .
 21,7 want mit deme guote wehset dê unmæzige muot .
 21,8 dê iemer ginente is ûfe daz unsælige guot .
 21,9 inde en sient niet daz dit gelücke is ungelückic .
 21,10 inde dise sælicheit is unsælic .
 21,11 want si die sêle van der wârer sælicheite .
 21,12 inde van deme rehteme gelücke scheident .
 21,13 want dit is des süezen Jêsus lêre .
 21,14 “iz en mac nieman dienen zwein widerwürtigen hêrren .
 21,15 ir en müget niet dienen gote inde der rîchheit .”
 21,16 die sô manige sêle hât verleit .
 21,17 die niemer en wirdet zuo gote brâht .
 21,18 obe alle heiligen tæten alle ire maht .
 21,19 want van der hellen en is engeine widervart .
 21,20 wê ime dê eines dâ vunden wart .
 21,21 want hê sal iemer vallente sîn .
 21,22 daz erbe sal iemer wesen sîn .
 21,23 sîn schatz sal in iemer zuo deme apgründe wigen .
 21,24 daz hê niemer en müge stille geligen .
 21,25 dit is dê angestlîche swile .
 21,26 die der tumber liute betriuget alsô vile .
 21,27 dise siuchede maht dû wole verwinnen .
 21,28 wilt dû des süezen Jêsus leben lesen mit sinne .
 21,29 sich wie arm hê in dise werelt quam .
 21,30 dô hê dînes vleisches roc an sîne goteheit nam .
 21,31 sich wie arm was allez sîn leben .
 21,32 also wir mügen an sînen Worten vernemen .
 21,33 die wort si sint jâmers vol .
 21,34 want hê sprach “die vuhse si habent ire hol .
 21,35 die voge le habent ire nest bescheiden .
 21,36 dâ si der rasten mügen inne beiten .
 21,37 des mennischen sun hê en hât der stete engeine
 21,38 dâ hê sîn houbet ane geleite .”
 21,39 dâr nâh sich daz allerarmeste ende .
 21,40 dâ ime gebunden wâren beide die vuoze inde die hende .

 22,1 dâ hê nachet stuont betalle .
 22,2 in deme spotte inde in deme schalle .
 22,3 hier willen ich daz dû üebes dînen gedanc
 22,4 inde an in trîbes dîn herze âne wanc .
 22,5 inde durchmerkes daz schantlich armüete .
 22,6 daz dê süeze Jêsus leit aleine durch sîne güete .
 22,7 inde daz dû rîche würdes .
 22,8 sich ecker wie dû ime des antwürtes .
 22,9 prüeve daz hê noch schande en vorhte noch ungemach

22,10 hê en würde arm durch dîn gemach .
 22,11 inde en schône dîneme gemache inde dîner êren niet sô sêre .
 22,12 dû en geltes ieteswaz deme süezeme Jêsu . dîneme lêrære
 22,13 hê en bitet dich niet alsô vile lîden alse hê leit .
 22,14 sîn kriuze iz wære dir harte vile alze breit .
 22,15 hê bitet daz dû ime aleineme daz herze gebes .
 22,16 inde daz dû nâh der werelte niet en strebes .
 22,17 hê en mac mit engeineme gesellen sîn .
 22,18 aleine mac hê inde willt hê wesen dîn .
 22,19 mit ime mac dir inde sal dir wole genüegen .
 22,20 wilt dû die sachen rehte wegen inde prüeven .
 22,21 âne in sô en maht dû niemer rîche werden .
 22,22 âne besæzes dû den himel inde die erden .
 22,23 gewinnes dû ouch inen aleine .
 22,24 sô en darft dû niemer armüete geweinen .
 22,25 want hê en kumet niet aleine .
 22,26 dê süeze küninc inde reine .
 22,27 sîn vater kumet mit ime . inde die êlîche geist .
 22,28 inde die schare der tugende allermeiste .
 22,29 die brengent die unzallîche volleist .
 22,30 dusgetânen gast is iz guot inde süeze entvâhen .
 22,31 inde boese geste mit aller der maht ûz slân .
 22,32 dis gast hê is allen den gereit .
 22,33 die ime die herberge habent bereit .
 22,34 des gibet hê selbe urkünde .
 22,35 mit sînes trûten Johannis munde .
 22,36 “ich stân” sprichet hê “zuo dere türe inde klopfen .
 22,37 inde sôwê mir sîne türe willet machen offen .

23,1 alse hê gehoeret mîne stimme .
 23,2 ich sal zuo ime gân dâr enbinnen .
 23,3 inde ich sal mit ime ezzen inde hê mit mir .”
 23,4 würde uns dis gast wie rîche wæren wir .
 23,5 wir solten wole werden gespîset .
 23,6 a hâ weliche mursel van sîneme tische rîsent .
 23,7 wir sien ecker waz wir ime ane rihten mügen .
 23,8 hê is ôtmüetic ime mac lîhte genüegen .
 23,9 ich wænen hê willt dînen willen haben .
 23,10 âne is hê kranc . dû maht in doch dâ mite laben
 23,11 wider diseme willen sal hê dir sîne genâde geben .
 23,12 dâ mite volget daz êwige leben .
 23,13 dît is die himelische rîchheit .
 23,14 dere engein ander schatz gelîchet .
 23,15 dâr ane salt dû dîne gerunge legen .
 23,16 engeine ander girede sal dîn herze bewegen .
 23,17 sô maht dû lîhte vore der boesere girheite genesen .
 23,18 inde sicher an der genâden gotes wesen .
 23,19 ich wænen sôwen dises ezzenes wole geluste .

23,20 an ime solten sterben alle vleischliche gelüste .
23,21 want sôwanne sich die himelische gelust in daz herze lehte .
23,22 ich wænen daz die werelt ire gelust alze vergebenes bræhte .
23,23 susgetâne wort sal man ûf die swile breiten .
23,24 dâr in die boese girede hât ire vergibnisse geleitet .
23,25 alhier ane sprich van den wîzen bluomen van deme êrsten blate
23,26 sûeze Jêsus ich kêren mîne ougen aber an dich .
23,27 want di bûrden si beswæret mich
23,28 mîne ougen sint mir sêre vergangen .
23,29 inde dâr umbe willen ich an dir hangen .
23,30 want dû bis daz wære lieht .
23,31 daz dîne volgære en verleitet niht
23,32 geleite mit dîneme liehte mîne sinne .
23,33 want ich van mir selbere diuster bin .
23,34 want dû bis guot inde rîchelîche milte .
23,35 âne sî ich arm inde genoete .
23,36 gip mir sûeze vater dîne stiure .
23,37 daz ich sprechen müge van dîneme viure .
23,38 daz is dîne sûeze minne .
23,39 dâr zuo ervülle mîne sinne .

24,1 ich bin mit dîner helfe kumen .
24,2 an der liljen wîze bluomen .
24,3 an wen die sehswaltige sache bezeichent is .
24,4 wâr umbe dû sûeze hêre ze minnenne bis .
24,5 der blatere an der wîzer bluomen . sint sehse .
24,6 an einer iewelicher liljen die vollewehset .
24,7 mit den sint sehse sachen bezeichent .
24,8 die uns an des sûezen Jêsus minne beweichent .
24,9 daz êrste blat bezeichnenet die êrste sache .
24,10 die is dâr umbe daz hê uns hât gemacht .
24,11 in diseme blate lises dû die grôze werdicheit .
24,12 die dir gegeben hât die guote goteheit .
24,13 hier salt dû merken zwâ sachen .
24,14 wie inde wâr umbe hê dich hât geschaffen .
24,15 dîner sêlen getæne is vile hêrlich .
24,16 want si is edellich .
24,17 daz haben ich dâ vore bescheiden .
24,18 dâ ich sagete van der sêlen drîvalticheite .
24,19 daz is van der drîvaltiger maht .
24,20 die si nâh der gotelîcher drîvalticheite hât .
24,21 want alse an deme vatere . inde deme sune .
24,22 inde deme heiligen geiste .
24,23 is gewalt . inde wîsheit . inde gûete
24,24 alsô hât eines mennischen sêle die selben drî tugende .
24,25 want si hât an ire die wîsheit .
24,26 daz is des guoten inde des boesen eine bescheidenheit .
24,27 sô hât si och die gûete .

- 24,28 daz si mac minnen daz guote .
24,29 sîn gewalt is die dritte maht .
24,30 dâ mite die sêle daz boese vertrîben mac .
24,31 alsus is die sêle geschaffen nâh gotes bilede .
24,32 si wære sælic die daz wole behielte .
24,33 die sich mit den swarzen sünden niemer beschribe .
24,34 dâr si dit schoene bilede mite vertribe .
24,35 alhier sprich van deme anderen blate der liljen
24,36 den lîchamen hât dir ouch got gegeben .
24,37 den hê geschuof van der ungeschaffenere erden .
24,38 merke wie grôze zierheit hê dâr ane hât gelaht .
24,39 obe dû prûeves allerlidelîch nâh sîner maht
- 25,1 inde daz wizzes daz hê den lîchame .
25,2 dir durch grôze minne hât getân ane .
25,3 dâr umbe daz dû desten ôtmüetiger sîs .
25,4 also dû dînes lîchamen krancheit sîs .
25,5 des der engel niet en mohte sien .
25,6 dô hê ane sach sînen grôzen schîn .
25,7 ei wie wole wære geschiet sîner stolzheit .
25,8 hette hê gehât des vleisches ôtmüetigheit .
25,9 sô en torste hê niet begert haben der unmæziger êren .
25,10 also hê gesien hette wie nider hê wære .
25,11 dâr umbe dô der engel niet en bestuont .
25,12 dê engeine sache an ime truoc .
25,13 die in machete nideren an sîneme gemüete .
25,14 got hê machete den mennischen durch sîne güete .
25,15 daz hê mit des vleisches ôtmüetigheit .
25,16 verwünne des geistes stolzheit .
25,17 umbe dise rede is dir dê roc des vleisches ane getân .
25,18 minne got her umbe wilt dû iz rehte verstân .
25,19 dit hân ich alsus gesprochen ze diute .
25,20 durch eteslîche tumber liute .
25,21 die gote niet en willent danken .
25,22 also si sient iren lîchamen kranken .
25,23 inde en sient niet daz an der krancheit des vleisches .
25,24 liget die grôze sterkede des geistes .
25,25 nû sich wie grôzer minnen got sî wert wider dich .
25,26 dê dich hât gemachet beide hêr inde ôtmüetic
25,27 an dîner sêlen liget dîne hêrheit .
25,28 an deme lîchamen dîne ôtmüetigheit .
25,29 dû en mohtes niemer baz geschaffen sîn .
25,30 spriches dû iht anders daz unreht iz is dîn .
25,31 zuo der stat der tumber engele .
25,32 hât hê dich betirnet in deme himele .
25,33 daz dû dâ iemer sînen lop singes
25,34 obe dû selbe hier . lebende dâr nâh ringes .
25,35 dit is die êrste sache dâr umbe dû got salt minnen .

25,36 die andere sache salt dû ouch merken mit allen sinnen .
25,37 den guoten got en dûhte niet genuoc .
25,38 daz hê dich den anderen krêatiuren vore truoc .

26,1 hê ne wolte dich nochdan mêr êren .
26,2 inde sezte dich allen sînen gescheffeden einen hêren .
26,3 wilt dû dises rehte wîs werden .
26,4 sô merke den himel inde erde .
26,5 sich daz daz dîne hûetære sint die engele
26,6 die gotes antlitze beschouwent in deme himele .
26,7 die sunne der mâne . inte daz gestirre .
26,8 en mûgen sich van dîneme dieneste niet gevirren .
26,9 si sint mit ireme dieneste dîn .
26,10 want si gebent dir iren schîn .
26,11 die luft is dir ze dienenne gegeben .
26,12 want âne si en mohtes dû niet leben .
26,13 wie dir die erde sî undertân .
26,14 des en mac nieman engeinen zwîvel hân .
26,15 waz nutzes dû des wazzeres habes .
26,16 daz weist dû sô dû dich wasches obe labes .
26,17 dit sint die vier dinc dâ die werelt ane besteit .
26,18 die dienet dir mit allen den dingen die si umbeveit .
26,19 naht inde tac sint dir gemachet .
26,20 zuo dîneme nutze inde zuo dîneme gemache .
26,21 der tac hê liuhtet dir zuo dîner arbeit .
26,22 die naht is dir zuo dîner rasten bereit .
26,23 inde waz mac ich nennen alle sachen .
26,24 alle dinc sint durch dînen willen geschaffen .
26,25 want die engele en dorften der werelte niet .
26,26 die alle zît ane sient iren hêren . daz wâre lieht .
26,27 wie grôze minne dû gote her umbe schuldic sîs .
26,28 daz maht dû selbe prûeven bis dû wîs .
26,29 prûeve inde minne den grôzen hêren .
26,30 dê dich hât gemachet zuo alsô grôzen êren .
26,31 inde want hê dich hât gemachet alsus wert .
26,32 dienes dû ime des is hê wole wert .
26,33 want wilt dû sîner krêatiure dienst nemen
26,34 sô salt dû ime billîche dînen dienst geben .
26,35 daz dû gote sîs alsô undertân .
26,36 alse dû sîne geschepfenisse . wilt under dir hân .
26,37 sich wie unbillich dich daz dûhte .
26,38 van deme viure inde van der lufte .

27,1 inde ouch van deme wazzere inde van der erden .
27,2 obe si sich van dîneme dieneste kêrten .
27,3 michel unbillicher sal iz dunken unsen schepfære .
27,4 daz dû dich van ime kêres .
27,5 want dû wilt die werelt haben zuo dîneme gemache .

- 27,6 die dû engeine wîs niet en hâs gemachet .
 27,7 inde dû en wilt niet dienen dîneme hêren .
 27,8 dê dich geschaffen hât zuo sînen êren .
 27,9 sich ouch daz die werelt der hêre dû bis .
 27,10 engeines lônnes an dir wartente en is .
 27,11 wan dû beites grôzes lônnes .
 27,12 van dîneme hêren . der êwiger krônen .
 27,13 wilt dû danne daz alle dinc zuo dîneme dieneste sîn bereite .
 27,14 die engeines lônnes an dir beiten .
 27,15 wie sêre salt dû diensthaftic sîn deme .
 27,16 van deme dû sô süezen lôn denkes nemen .
 27,17 dîn dienst sal sîn ze vorderest daz dû in minnes .
 27,18 van aller dîner maht . inde van allen dînen sinnen .
 27,19 ei wie süezen sinnes is die reine minne .
 27,20 die niet en roubet wan machet rîche die sinne .
 27,21 sôwê sîne minne niet en willt gote geben .
 27,22 wanne gæbe hê allez sîn guot inde sîn leben .
 27,23 alhier ane sprich van deme dritten blate der liljen
 27,24 daz dritte blat daz is die dritte sache der minnen
 27,25 iz mac dîn herze noch mêr verwinnen .
 27,26 want daz blat bezeichnenet die grôze verdultheit .
 27,27 die got kêrte zuo des mennischen bôsheit .
 27,28 want dô der mennische sich hatte geworfen in die sünden .
 27,29 mit rehte mohte in got werfen zuo deme hellischeme grunde .
 27,30 inde zuo deme êwelîcheme viure .
 27,31 dâ ime die lôsunge wære tiure .
 27,32 wane des en tæte hê niet zehant .
 27,33 biz hê ime bûte allerêrst die hant .
 27,34 sîner barmherzicheite .
 27,35 obe hê sich lîhte kêrte wider an daz geleite .
 27,36 sînes süezen schepfæres .
 27,37 die in hatte geschaffen zuo allerêrest .
- 28,1 want daz vinden wir geschriben stân .
 28,2 daz Adâm dô hê die sünde hatte getân .
 28,3 – hê barc sich under eines boumes rîsen .
 28,4 alse in nieman dâ en solte gote wîsen .
 28,5 hê was schiere zuo eineme tôren worden .
 28,6 dô hê wart ungehoeric gotes worten .
 28,7 dê was geschaffen in sô grôzer wîsheit .
 28,8 inde viel sô schiere in sô grôze tumpheit .
 28,9 noch dô en begap in got niet nâh deme valle .
 28,10 want hê geruochte mit ime kallen .
 28,11 inde sprach “Adâm wâ bis dû .”
 28,12 alse hê spræche “bekenne dich nû .
 28,13 in wie grôzeme jâmere dû bis bevangen .
 28,14 want dû mân gebot hâs übergangen .
 28,15 sich van wie grôzer sælicheit .

- 28,16 dû sîs gevallen in dise jâmericheit .”
28,17 dise maninge gibet hê noch allen den süntæren .
28,18 nochdan daz si sich van ime turren kêren .
28,19 hê vertreget sîne smâchheit sô guotlîche .
28,20 hê beitet . inde manet dich dicke vaterlîche .
28,21 inde en wrichet sîn unreht niet schiere .
28,22 daz hê dîne minne alsô verdiene .
28,23 alhier sprich van deme vierden blate der lilje
28,24 vernim wie wole hê dîner minnen sî wert .
28,25 dere hê alsô manige wîs begert .
28,26 want uns en beweget niet sô sêre zuo der minnen .
28,27 alse daz wir sien daz man uns beginnet minnen .
28,28 daz herze iz is verkaltet sêre .
28,29 daz niet en minnet sînen minnære .
28,30 nochdan daz hê vile krankere is .
28,31 wan dû dû dâ geminnet bis
28,32 minne got dê dich geminnet hât .
28,33 minne diu minne daz is mîn rât .
28,34 diu minne hât sich selben an dich getragen .
28,35 dû en salt ire dîne minne niet versagen .
28,36 sôwê bekennet daz in got verdolet hât .
28,37 inde vertragen nâh sîner missetât .
- 29,1 zuo deme hât got rehte sache .
29,2 dâ hê sîner minnen sîn herze mache .
29,3 diser minnen en mac sich noch en sal nieman entsagen .
29,4 wan dê engeine sünde en darf klagen .
29,5 daz en is nieman alse ich wæne .
29,6 wan dê niet en quam zuo diseme lebene .
29,7 sûeze got ich en kan dir niemer envollen danc gesagen .
29,8 daz dû mich bizze here hâs vertragen .
29,9 vertrac mich bizze an daz ende mîner tage .
29,10 daz ich mîne sünden envollen klage .
29,11 ich bin zuo der vierder sachen der minnen kumen .
29,12 die sal ich lesen an deme vierden blate der wîzer bluomen .
29,13 gip mir sûeze Jêsus . daz ich si volle gesien müge .
29,14 inde daz ich ouch si ze sprechenne tuge .
29,15 want alle tugende ligent hier .
29,16 ob man dit blat lûterlîche ane sie .
29,17 hier liget der strôm der barmherzicheite . die got an uns wolte legen .
29,18 inde uns zuo sîner minnen bewegen .
29,19 sôwê hier niet beweget en wirdet .
29,20 sîn herze hât einen boesen wirt .
29,21 dê iz an boeser harticheite sterket .
29,22 daz iz des kriuzes pîne niet en merke .
29,23 is dîn herze hart alse die erde sunder wazzer .
29,24 dû maht die die trâne des sûezen Jêsus dâr in vazzen .
29,25 inde begiezen dîne durre unnütze erde .

- 29,26 daz si naz inde berhaftic wirdet .
 29,27 noch is eine andere arzâtîe .
 29,28 der dû nôte mohtes verzîhen
 29,29 wie dû maht kumen an daz weinen .
 29,30 ob dîn herze is hart inde steinîn .
 29,31 ich willen dir einen hamer wîsen .
 29,32 inde drî beizele die sint îserîn .
 29,33 die salt dû in dîn harte herze slân .
 29,34 daz die træne dâr ûz mügen gân .
 29,35 daz hêre kriuze mache zuo eineme hamere .
 29,36 die beizele sîn die drî îserîn nagele .
 29,37 die durchgruoben beide hende inde vuoze .
 29,38 des guoten Jêsus inde des süezen
- 30,1 en brichet dich diser beizele engein .
 30,2 sô bis dû hartere danne dê stein .
 30,3 dê grôz wazzer in der wüestenîen gap .
 30,4 dô in Moises zwirent mit einer gerten traf .
 30,5 wante iz is ein stein der natûren .
 30,6 den man noch mit îserne noch mit viure .
 30,7 noch mit engeineme harterme dinge .
 30,8 mac gebrechen obe betwingen .
 30,9 wan mit des zickelînes bluote aleine
 30,10 nû hoere inde vernim waz ich meine .
 30,11 ein michel starker bluot wil ich dir zounen .
 30,12 des dû selbe niet en maht gelougenen .
 30,13 daz is des süezen lambes bluot .
 30,14 daz van ime vlôz mit starker vluot .
 30,15 dâr in salt dû dîn steinîn herze legen .
 30,16 sô maht dû iz lîhte beweichen inde bewegen .
 30,17 daz daz wazzer der træne dâr ûz vliuzet .
 30,18 der dîne sêle wole geniuzet
 30,19 nû sien wir al van aneginne .
 30,19a dit vierde blat der süezer minnen .
 30,20 dise sache der minnen beginnet aldâ .
 30,21 dô uns gotes sun quam alsô nâhe .
 30,22 daz hê unse mennischheit an sich nam .
 30,23 inde zuo uns in dise werelt quam .
 30,24 ich willen daz verswîgen . daz hê niun mânde wolte belîben .
 30,25 beslozen in sîner reinere muoter lîbe .
 30,26 daz mohte uns sêre zuo der minnen trîben .
 30,27 daz die wîsheit gotes durch uns sô lange wolte swîgen .
 30,28 inde daz wâre licht wolte sô lange in vinsternisse ligen .
 30,29 dû salt daz aneginne des kriuzes bekennen .
 30,30 an der krippen . inde an den armen benden .
 30,31 sich den küninc des himeles inde der erden .
 30,32 in eine arme krippe geleget wolte werden .
 30,33 sich jæmerlîche hê gebunden lac

- 30,34 dê unser sünden bende zerbrach .
30,35 hê weinet als ein kint inde bermelîche .
30,36 den die engele hoerent alsô vroelîche .
30,37 des himeles vrôuwede wart unvrô in der erden .
30,38 daz dû mohtes vrô in deme himele werden .
- 31,1 nû hoere mich ein lützel vort .
31,2 inde vernim eines prophêten wort .
31,3 mit des zungen got van himelrîche .
31,4 sprach zuo dem mennischen alsô vaterlîche .
31,5 hê sprach “ich sal dich ziehen zuo dîneme heile .
31,6 mit des süntigen Adâmes seilen .
31,7 ich sal iuch zuo mir gewinnen .
31,8 mit den benden der starker minnen .”
31,9 nû merken wir dit wort tugendlîche .
31,10 want ich wænen daz ime kûme einic wort gelîche .
31,11 daz man læse obe sünge .
31,12 daz uns sô an gotes minne binde .
31,13 want daz kriuze liget allermeist an diseme kurzen worte .
31,14 daz zuo unser lösungen gehôrte .
31,15 alhier sprich van den seilen Adâmes
31,16 nû sien wir welich sîn die Adâmes seil .
31,17 mit den got ziuhet uns an sîn teil .
31,18 wir sulen ouch der minnen bende besien
31,19 die uns zuo gote sulen ziehen .
31,20 dô sich Adâm wîlen des vergaz .
31,21 inde den verboten apfel az .
31,22 umbe die ungehørsamicheit .
31,23 sô wart hê ûzer deme paradîse geleit .
31,24 inde in diser werelte karkære .
31,25 verwîset . ûzer der êrster êren .
31,26 inde wart dâ mit drin seilen gebunden .
31,27 die van niemanne en mohten werden entbunden .
31,28 bizze got an unse mennischheit quam .
31,29 inde die selbe Adâmes seil an sich nam .
31,30 der êrste bant daz was die grôze smâchheit .
31,31 die Adâm in diser werelte leit .
31,32 dô hê sich torste kêren
31,33 vrevellîche van der êrster êren .
31,34 dê dâ vore gote aleineme was undertân .
31,35 hê sach dâr nâh sich alle dinc versmâhen .
31,36 alsô daz hê sich einer untugend niet en mohte erwerben .
31,37 dê dâ vore gebôt deme wallente vische in deme mere .
- 32,1 hê muoste beide viur inde wazzer vûrhten .
32,2 des hê dâ vore niet en dorfte .
32,3 dô hê gote was undertân .
32,4 inde sîn gebot niet en hatte noch dô übergân .

- 32,5 daz ander seil was daz grôze armüete .
 32,6 daz hê leit dô hê sîn gemüete .
 32,7 kêrete van der himelischer rîchheit .
 32,8 inde viel in dit manicvaltige leit .
 32,9 dê eines boumes vruht niet en wolte entberen .
 32,10 dê anders hatte sôwes hê mohte begeren .
 32,11 inde vile rehte viel hê in dit armüete .
 32,12 deme niet en genüege de rîche got inde die güete .
 32,13 daz dritte seil was die swâre arbeit .
 32,14 die hê in diseme karkære leit .
 32,15 want hê in deme wünnicliche gemache .
 32,16 niet en wolte êweliche lachen .
 32,17 mit disen drin seilen wart der arme Adâm gebunden .
 32,18 dô hê wart an der ungehørsamicheite vunden .
 32,19 daz is mit der grôzer smâchheit .
 32,20 armüete . inde arbeite
 32,21 nochdan zweivaltic is die arbeit .
 32,22 die Adâme inde sîne kint noch umbeveit .
 32,23 daz is ze warm . ze kalt . hunger . inde durstes nôt .
 32,24 müednisse siuchede . inde ze jungeste der tât .
 32,25 dit sint die starke seil die got gotes sun an sich nam .
 32,26 dô hê uns zuo erloesenne quam .
 32,27 inde wolte vüre uns gelten unse schult .
 32,28 des hê niet en solte hette hê gewolt .
 32,29 alhier sprich van der arbeite Jêsu
 32,30 nû grîfen wir an daz êrste seil daz is smâchheit .
 32,31 inde sien wie vile daz hê dere leit .
 32,32 alse vile alse nie engein mennische mêr .
 32,33 dê sint geboren is obe was . ê .
 32,34 ime entbôt nieman engeine êre .
 32,35 sô hê doch der engele inde der liute hêre wære
 32,36 wane vile verdulticliche vertruoc sîne smâchheit .
 32,37 daz dû in dîne êre würdes wider geleit .
 32,38 wie sêre in der bant des armüetes bünde .
 32,39 des gibet uns daz êvangelium urkünde .
- 33,1 daz uns van sîner gebürte saget .
 33,2 “daz kindelîn wart in eine krippe geleget .
 33,3 inde mit kranken tüchelînen umbewunden .
 33,4 alsô wart iz van den hirten vunden”
 33,5 hê ne was niet rîchere dô hê gewuohs .
 33,6 want hê ne hatte noch die spîse noch daz hûs .
 33,7 wie arm hê an sîneme kriuze wære .
 33,8 des hâs dû dâ vore ein kurze lêre .
 33,9 want hê was nacket inde blôz .
 33,10 dâ hê gare mit sîneme bluote vlôz .
 33,11 dit armüete bant in durch dîne minne .
 33,12 daz dû den êwigen rîchtuom mohtes gewinnen .

33,13 wie hê gebunden wære mit der arbeit .
33,14 des hebes dû gelîche ein underscheit .
33,15 alse dû die sibenvaltige geisele ane sîs .
33,16 die machen dich van sîner arbeite wîs
33,17 wie dicke wænes dû daz ime alze heize wære .
33,18 deme unverdrozeneme gengelære .
33,19 ich meinen Jêsum den süezen predigære
33,20 dê in manigen steten spreitete sîne lêre .
33,21 dâ in in deme heizeme lande .
33,22 die hitze dicke sêre durchbrante .
33,23 ich wæne hê ouch lîhte den vrost gewünne .
33,24 want sîne kleidere wâren dünne .
33,25 hunger inde durst wâren ime heimelich .
33,26 want hê ne wolte hier niet wesen weledic .
33,27 ûf daz unse hunger würde gesatet .
33,28 inde unse durst gelabet .
33,29 wie dicke wart hê müede van predigenne .
33,30 van gânne inde van wachenne .
33,31 hê wart sô siech inde kranc durch unse minne .
33,32 daz ime nieman gelîchete al van aneginne .
33,33 dises haben wir manige urkünde .
33,34 an der prophêten inde an sînes selbes worten vunden .
33,35 “siet” spricht der prophête .
33,36 “inde merket vile rehte .
33,37 daz merke inde sinne iewelich .
33,38 ob mîneme riuwen is ieman gelîch .”

34,1 nein iz süeze Jêsu nein iz .
34,2 durch mîne minne lîdes dû dit .
34,3 daz engein mennische mêr en geleit .
34,4 want dû bekantes baz lieb inde leit .
34,5 ô wie sûr is dir mîne sêle worden .
34,6 want dû dâ alle dinc geschüefes mit eineme worte .
34,7 wie manic dinc hâs dû getân inde liden .
34,8 daz dû mich bræhtes in den êrsten vriden .
34,9 dû würdes sô sêre kranc inde sô nider .
34,10 daz ich starc quæme zuo dir dâr wider .
34,11 dannen ich arme was gefallen .
34,12 in diser bitterre werelte galle .
34,13 nû mîne sêle erschütte dich .
34,14 inde var zuo deme kriuze vroelich .
34,15 en lâz den süezen Jêsum niet aleine stân .
34,16 ruof “süeze küninc ich willen zuo dir gân .
34,17 dîne wunden lâz beschouwen mich .
34,18 wie tief si sîn inde wie angestlich .
34,19 lâz mich mîn herze mit dîneme bluote begiezen .
34,20 daz ich sien van dîneme herzen vliezen .
34,21 gip dich mit dîneme kriuze in mîne armen .

34,22 lâz mich an dîner umbehelungen erwarmen .
 34,23 mache mich mit dîneme bluote rô .
 34,24 mit dir müeze ich gebrûchen süeze brôt .
 34,25 biz an mînen jungesten tac an mînen tôt .”
 34,26 wilt dû mîne sêle an diseme gemüete belîben .
 34,27 dê süeze Jêsus en is sô unsüeze niet daz hê dich vertrîbe .
 34,28 wante dû ne salt daz kriuze niet sô kurzlîche übergân .
 34,29 dû salt vile muozlîche dâ vore stân .
 34,30 inde überlis al van aneginne .
 34,31 die krancheit der starker minnen .
 34,32 dîn herze umbevâhe den süezen Jêsum aleine .
 34,33 hê en willt mit eineme andere niet haben gemeine .
 34,34 dîner siucheden aneginne si sîn betwungen .
 34,35 inde die jâmerlîche wort sîner süezer zungen .
 34,36 “ich bin trûric” sprach hê “bize an den tôt .”
 34,37 nû sich wie hê steit in welicher nô .
 34,38 hê bibet also ein espîn loup .
 34,39 hier liget dîner minnen ein tiure kouf .

35,1 her nâh sich den bluotigen sweiz .
 35,2 dê sîne hût alüberal zerreiz .
 35,3 inde lief in die erde mit grôzer vluot .
 35,4 al in tropfen also daz rôte bluot .
 35,5 sich wie dê boese jungere .
 35,6 verrætet sînen meister inde sînen hêren .
 35,7 hê kûsete in vüre sînen süezen munt
 35,8 also hê wære sîn getriuwe vriunt .
 35,9 dâr nâh sich die jüdische hende .
 35,10 ane grîfen den küninc in sîneme ellende
 35,11 inde trecken also einen schæchære .
 35,12 den süezen vater . den guoten lêrære .
 35,13 sich daz ime gegeben wirdet manic stôz
 35,14 mit nîde . unsenfte inde grôz .
 35,15 sich aller der werelte rihtære vore der juden gerihte stân .
 35,16 sich den süezen predigære . zuo Pilatus gerihte gân .
 35,17 sich wâ hê – jâmerlîche geit aleine .
 35,18 sîne vriunde hatten in begeben algemeine .
 35,19 die hatten gesprochen si ne wolten in niet begeben .
 35,20 also lange also si mohten leben .
 35,21 iz en was engein mennische niet dê in trôste .
 35,22 obe dê in van sîneme jâmere erlôste .
 35,23 sich wâ hê vore Pilatô steit .
 35,24 inde heltet zuht inde verdulticheit .
 35,25 sich wâ man ime sîne kleidere ûz ziuhet .
 35,26 inde sînen süezen lîp mit den geiselen sô zerbliuwet .
 35,27 daz sîn heilic bluot an den pfilære spranc .
 35,28 dâ man iz noch spüret aber alsô lanc .
 35,29 sich wâ hê wirdet den heidenen ein spot

- 35,30 dê süeze küninc dê guote got .
 35,31 sich sînen rôten roc . inde sîne dürnîne krône .
 35,32 inde denke waz dû ime müges geben ze lône .
 35,33 sich baz danne ich gesprechen kunne .
 35,34 wie daz bluot über sîn antlitze rünne .
 35,35 wie hê gepflucket wart mit sînen barte .
 35,36 an sînen backen . inde an sînen hals geslagen sô harte .
 35,37 sich wâ hê zuo deme kriuze geit
 35,38 inde treget daz kriuze mit grôzer arbeit .
- 36,1 louf zuo hilf ime sîn kriuze tragen .
 36,2 sô mac hê dîne sünden desten baz vertragen .
 36,3 sich wâ man inen aber nachet machet .
 36,4 sliefes dû bizze here nû entwache .
 36,5 hier geit ane die oberste nôt .
 36,6 die martilje die brenget den tôt .
 36,7 sich wâ die unmilte heidenen .
 36,8 durchgrabent mit den starken nagelen .
 36,9 beide hende inde vuoze des grôzen heiligen .
 36,10 deme himel inde erde müezen nîgen .
 36,11 ô wê wie jâmerlîche is nû dîn gebære .
 36,12 grôze küninc süeze vater . inde hêrre .
 36,13 wê hât dich brâht in dise jâmericheit .
 36,14 süeze minne wan dîne barmherzicheit .
 36,15 inde dîne minne die dich zuo mir hât getragen .
 36,16 wê mohte diser minnen mâze gesagen .
 36,17 waz mac ich dir wider diser minnen geben .
 36,18 süeze minne . mîn herze inde mîn leben .
 36,19 dîn is allez daz ich geleisten mac .
 36,20 waz mac ich danne dâr über geben . ei mîner sêlen tac .
 36,21 nû mîne sêle beschouwe dînen heilant .
 36,22 sich wiegetâne arzâtîe hê hât . an dich gewant .
 36,23 die hê selbe wolte nützen alsô sêre
 36,24 alse ein getriuwe arzetære .
 36,25 sich obe hê niet des habe gelâzen .
 36,26 daz dîne siuchede mohte sâzen . –
 36,27 hê nam allez daz an sich .
 36,28 dâ mite hê mohte geheilen dich .
 36,29 hê zounete sîne siuchede an sîner bibungen .
 36,30 hê sweizete bluot umbe dîne bekêrunge .
 36,31 ime wart mit den geiselen geschraffet .
 36,32 über allen sînen lîp mit grôzeme ungemache .
 36,33 hê liez zuo allen den âderen daz heilige bluot .
 36,34 daz dir dîner siucheden alsô würde gebuozt .
 36,35 hê machete vinsternisse über al ertrîche .
 36,36 alse die gelâzenen pflegent ie emzlîche
 36,37 sich daz hê ze jungeste vûre dich transc .
 36,38 den bitteren mirren . gallen . inde ezziches transc .

- 37,1 nû merke die ungevüege vliemenslege .
 37,2 dâr in Thomas sînen vinger inde sîne hant mohte legen .
 37,3 nû sich ob hê iet des übergangen habe .
 37,4 dâ mite hê dîne grôze siuchede mohte gelaben .
 37,5 waz mohte hê nû mêt sprechen tuon . obe lîden
 37,6 dê durch dich engeine pîne en wolte vermîden .
 37,7 hier en gehôrte niet mêt zuo danne der tût .
 37,8 dê quam inde quam mit grôzer nôt .
 37,9 eine kleine pîne en mohte niet vertrîben .
 37,10 die sîeze sêle van deme reineme lîbe .
 37,11 ires hêren tût en mohte engeine krêatiure getragen .
 37,12 wan si muosten in alse si solten ze rehte klagen .
 37,13 daz schein an deme mânen inde an der sunnen .
 37,14 die van der vinsternisse wurden verwunnen .
 37,15 daz wart ouch offenbâre an der ertbibungen .
 37,16 inde an den steinen die al ze stücken sprungen .
 37,17 welich herze hier ganz belîbet iz is hartere danne die steine .
 37,18 die sprungen alse si wolten den tûten weinen .
 37,19 weine inde vrôuwe dich in den trænen .
 37,20 want dir is baz geschiet danne dû mohtes weinen .
 37,21 dis tût . inde dise jâmericheit .
 37,22 hât dich wider in daz leben . inde in die vrôuwede geleit .
 37,23 dit sint die seil die bunden den alten Adâme .
 37,24 die dê sîeze Jêsus truoc an sîneme heiligen lîchame .
 37,25 daz hê dich hier mite zûge zuo sîner minnen .
 37,26 en minnes dû noch niet . sô bis dû verre van dînen sinnen .
 37,27 biz daz dû müezes gewinnen .
 37,28 daz gewâre licht an den ougen enbinnen .
 37,29 daz dû müezes vollesien .
 37,30 den sîezen Jêsum . inde vore sîneme kriuze ligen .
 37,31 mit dînen warmen . trænen . inde ûf dînen barwen kniewen .
 37,32 alhier sprich van den benden der minnen
 37,33 der minnen bende sulen wir kurzêliche sprechen .
 37,34 daz dich mîner worte niet en vermeche .
 37,35 die êrste bende die den sîezen Jêsum bunden .
 37,36 hân wir mit ime in der krippen vunden .
- 38,1 dîn loesære læzet sich binden .
 38,2 daz dû vrîheit müges vinden .
 38,3 der ander bant wart ime ane gelaht .
 38,4 dô hê gebunden wart vûre daz gerihte brâht .
 38,5 an deme kriuze vindes dû den dritten bant .
 38,6 an beiden vuozen . inde an iewederre hant .
 38,7 der êrste bant was gemechlich . inde vol ôtmüetigheite .
 38,8 der ander was vile swêrlîch . inde vol jâmerheite .
 38,9 dê vrîe kûninc van himelrîche .
 38,10 treget die bande eineme diebe gelîche .

- 38,11 dê aleine binden inde entbinden mac .
 38,12 lîdet an benden unreht inde ungemach
 38,13 die dritte bende wâren tôtlich .
 38,14 si tâten die sêle van deme lîchame scheiden sich .
 38,15 mit den êrsten bant in sîn muoter lîselîche .
 38,16 mit den anderen . benden bunden in die juden nîtlîche
 38,17 mit den lezzesten benden bunden in die heidenen tôtlîche .
 38,18 die êrste bende wâren lînîn alse ich haben vernomen .
 38,19 die andere wâren van eineme seile genomen .
 38,20 die lezzesten wâren harte îserîn .
 38,21 die in zuo deme tôde brâhten den sîezen hêren .
 38,22 dit sint des sîezen Jêsus bende
 38,23 die in bunden durch dich in diseme ellende .
 38,24 mit disen benden sal hê dich ze rehte sien
 38,25 wê ime dê der minnen benden willt entvliehen .
 38,26 ich hân angst daz hê in boese bende sule vallen .
 38,27 unde sînen vîanden werden ze schalle .
 38,28 vliuh in der minnen bende . wilt dû vliehen .
 38,29 wirdes dû danne gefangen . sô ne mohte dir niemer baz geschien .
 38,30 âne dise bende en maht dû niemer werden vrî .
 38,31 wænes dû iet anders dir is daz boese gevangnisse bî .
 38,32 alhier ane sprich van deme vûnften blate der liljen
 38,33 daz vûnfte blat der bluomen is die vûnfte sache .
 38,34 die uns manet daz wir zuo des guoten Jêsus minnen wachen .
 38,35 ich hân sinnes vile ze kleine .
 38,36 ze sprechenne van diser sachen aleine .
 38,37 want ich en mac niet begrîfen mit mînem muote .
 38,38 die unzallîche . inde die vaterlîche gûete .
- 39,1 die dê sîeze vater zuo uns wolte wenden .
 39,2 sôwie lange wir sîn in diseme ellende .
 39,3 ime en genûegete niet daz hê sînen engelen hatte geboten .
 39,4 daz si uns vûrderten zuo sînen geboten .
 39,5 inde behuotten uns vor aller nôt .
 39,6 alle unse lebetage biz an unsen tôt .
 39,7 die uns hûetent al stillîche vore manigen sachen .
 39,8 die uns van unseme schepfære mohten verre machen .
 39,9 inde benement uns dicke den boesen willen .
 39,10 dê uns mohte tuon wider gotes willen .
 39,11 über dit allez gap hê uns sîne stiure .
 39,12 edel inde hûlfelich über alle krêatiure .
 39,13 daz is sînen – heiligen lîchamen inde sîn bluot .
 39,14 sô sîeze . sô reine . sô starc . inde sô guot .
 39,15 dit is die spîse van dere is gesprochen .
 39,16 daz wort des mîn herze is entlochen .
 39,17 daz is daz der mennische hât geezen der engele brôt .
 39,18 daz brôt . daz vertribet den êwigen tôt .
 39,19 dit is daz brôt daz sprach van ime selbeme .

- 39,20 "ich bin daz lebende brôt daz quam van deme himele
39,21 sôwê izzet dit brôt wertliche
39,22 hê sal leben êweliche .
39,23 want dit brôt daz ich geben
39,24 is mîn lichame . umbe der werelte leben ."
39,25 sôwê niet en nûzet diser spîsen .
39,26 got sal in an deme urteile verwîsen .
39,27 zuo deme hellischen viure .
39,28 dâ hê en wartet engeiner stiure .
39,29 want sôwê sich van sîneme heile willendes kêret .
39,30 sîn unheil sal her nâh wider sînen willen werden gemêret .
39,31 wan dise spîse willt wirtliche genûzet werden .
39,32 ô wê wê is ire wert ûf diser erden .
39,33 daz willen ich dich mit kurzen Worten wîsen .
39,34 sôwê vor minnet hê geit sicherliche zuo diser spîsen .
39,35 hâs dû die minne sô sîs unerværet .
39,36 want sîn antlitze is van dînen sünden gekêret .
39,37 dê aldâ willt zuo dîneme grôzen vrûmen .
39,38 wære got inde wære mennische in dîne sêle kumen .
- 40,1 waz hôhgezîtes wænes dû daz dâ sî .
40,2 dâ dê himelische briutegume sîner brût kumet bî .
40,3 dâ hê sich selben vindet in der sêlen hûse .
40,4 die wære minne dê sûeze Jêsus
40,5 dit is die meiste werdicheit
40,6 die dir in diseme lebene mohte werden bereit .
40,7 daz ein alsô grôz gast in dîne sêle wolte kumen .
40,8 des dû hettes sô grôze êre . inde vrûmen .
40,9 sich wes dû mêr mohtes ze rehte begeren .
40,10 des dich dê guote Jêsus mohte geweren .
40,11 minne den sûezen . want hê is sô minnesam .
40,12 lobe in van herzen . want hê is sô lobesam .
40,13 wê is baz minnen inde lobes wert .
40,14 wan dê dich sô maniger gâben hât gewert .
40,15 der dû niet en torstes haben begert .
40,16 hê gap dich dir . dô hê dich gemachete .
40,17 aber gap hê dich dir . dô hê dich widermachete .
40,18 daz is dô hê dich van dînen sünden entbant .
40,19 inde mit sîneme kriuze ledigete van des vîandes hant .
40,20 inde want dû noch niet en mohtes sicher sîn vore deme widervalle .
40,21 hê gap dir stiure ûf den wec sich selben albetalle .
40,22 waz mohte hê dir sô grôzes geben .
40,23 also sich selben daz êwige leben .
40,24 umbe dich selben bis dû dich .
40,25 dîneme gebære zwîrent schuldic .
40,26 sô muost dû sîn schultgemare belîben .
40,27 want dû en maht dich niet zwîrent vergelten mit eineme lîbe .
40,28 waz wilt dû ime danne geben umbe in

- 40,29 des werdicheit übergeit unmæzliche allen sin .
 40,30 gilt ime alsô verre alse dû maht .
 40,31 minne in van alleme dîneme herzen . inde van aller dîner maht .
 40,32 dê guote Jêsus nimet ebene van deme armen schultgemaren .
 40,33 inde læzet dich ledic zuo deme himelrîche varen .
- 41,1 alhier ane sprich van deme sehsteme blate der liljen .
 41,2 daz sehste inde daz lezzeste blat der bluomen .
 41,3 dit is uns nû ze sprechenne zuo kumen .
 41,4 dit blat is der sehster sachen ein zeichen .
 41,5 die uns aleine zuo der voller minnen mac erweichen .
 41,6 die wurzele diser süezer minnen .
 41,7 sulen wir an deme vroelîcheme worte vinden .
 41,8 daz dê guote Jêsus sprach .
 41,9 dô ime bî was sîner martiljen tac .
 41,10 “ich varen” sprach hê “daz ich iuch die stat bereite .
 41,11 inde ich sal aber kumen zuo iuch . nâh iuwerer beiten .
 41,12 inde sal iuch zuo mir nemen . daz ich iuch geleite .
 41,13 dare dâ ir engeinen angest en hât van deme gescheide .
 41,14 dâ en sal iuwer vrô herze niemer trûren van engeineme leide .”
 41,15 hebe dich ûf swâr herze . inde vernim dîne sælicheit .
 41,16 die dir dîn hêre inde dîn vriunt hât bereit .
 41,17 van diser vrôuweden en kan ich niet gesprechen .
 41,18 wan daz nieman en kan gerechen .
 41,19 wan daz mûgen wir van den buochen lernen .
 41,20 daz wir aller jâmericheite dâ sulen entberen .
 41,21 hunger inde durst . warm inde kalt .
 41,22 wirdet dâ êwelîche nider gevalt .
 41,23 sich en sal dâ nieman über den anderen erheben .
 41,24 diu minne sal uns alle dâ machen eben .
 41,25 wir sulen dâ alle kûninge sîn inde rîche .
 41,26 gewaltic in deme himelrîche .
 41,27 wir sulen des guoten Jêsus erbegeuosen sîn .
 41,28 wir sulen dâ trinken den ungemengeneten wîn .
 41,29 daz quît . wir sulen der vrôuweden dâ gebrûchen .
 41,30 dâ engeine unvrôuwede en mac zuo geruochenne .
 41,31 dâ sulen die gotes liebsten alsô trunken werden .
 41,32 daz si vergezzen sôwaz si liden ûf der erden .
 41,33 dê guote Jêsus sal alle træne wischen van iren ougen .
 41,34 hê sal si mit sîner verborgener süezicheite sougen .
 41,35 waz liehtes sal hê iren ougen wænes dû dâ erscheinen
 41,36 die in disen diusternissen durch in wolten weinen .
 41,37 waz süezes sanges sulen die sælige sêlen dâ hoeren .
 41,38 die in diseme lîbe hatten kiusche inde verdultige ôren .
- 42,1 daz quît . die hier en wolten niet hoeren einige unkiuschheit .
 42,2 inde zuo den vîantlichen zungen truogen verdulticheit .
 42,3 der engele lop sulen si dâ dâr wider hoeren .

- 42,4 van den niun volkomenen koeren .
 42,5 inde si sulen ouch selbe mite singen .
 42,6 daz aller der himel sal van vröuweden klingen
 42,7 daz ich noch gesprochen hân daz is niet .
 42,8 wir sulen dâ sien den guoten Jêsum daz süeze licht .
 42,9 waz schînes wânes dû daz hê selbe ane trage .
 42,10 sô hê van den gerechten selbe sage .
 42,11 “danne sulen die gerehte liute blîchen .
 42,12 also die sunne in ires vateres rîche .
 42,13 doch ein iewelich nâh sîneme werde .
 42,14 also hê verdienet hât hier in der erden .”
 42,15 ein iewelich sal dâ nâh sîneme kriuze schînen .
 42,16 daz is . nâh sînen tugenden . inde nâh sînen pînen .
 42,17 dâr nâh daz dîn kriuze was hier breit inde lanc .
 42,18 dâr nâhe sal an deme schîne gemâzet werden dîn danc .
 42,19 nâh disen Worten sal die süeze keiserinne .
 42,20 die krône tragen der allermeister minnen .
 42,21 weist dû wen ich meinen .
 42,22 die süeze Mariam die muoter alsô reine .
 42,23 ires sunes kriuze en stuont nieman alsô bî .
 42,24 in der bitterer martiljen also si .
 42,25 dâr umbe klaget hê in eineme prophêten alsô jâmerlîche .
 42,26 “ich hân des kriuzes keltene getreten . alsô sunderlîche .
 42,27 daz engein man mit mir en besteit .
 42,28 dê gelîche mit mir lîden wolte . mîne trûebicheit”
 42,29 dîne klage is reht vile süeze erloesære .
 42,30 die si sint alle van dir gekêret .
 42,31 iz is ein arm vrouwelîn die dir gesteit .
 42,32 die dir aleine niet abe en geit .
 42,33 in dere herzen also ganz dîn kriuze steit .
 42,34 dâr umbe makes dû si nû sunderlîche vrô inde gemeit .
 42,35 sunderlîche si umbevit .
 42,36 dîne zeswe . nâh der trûebicheit .
 42,37 dise keiserinne en kumet niet aleine zuo hove .
 42,38 wane si brenget wîz gesinde mit grôzeme lobe .
- 43,1 wilt dû merken wie wir sulen volgen irer vröuweden .
 43,2 dû salt einlif tûsent sunnen alzemâle schouwen .
 43,3 inde dâr nâh alle die süeze megede .
 43,4 die die keiserinne bewegen sal obe ie bewegete .
 43,5 mit deme niuwen gelûbede irer kiuscheheite .
 43,6 inde mit iren siten sunderlîcher reinicheite .
 43,7 dise sulen alle tragen sunderlîche krônen .
 43,8 dâ mite ire briutegume sal sînen briuten lôn .
 43,9 die krône heizet in latîne . aureola .
 43,10 sunder die megede en treget si nieman dâ .
 43,11 inde sunder die bluotige martelære .
 43,12 inde die geloubige lêrære .

- 43,13 deme gotes lambe volget die keiserinne .
 43,14 sôwâ iz hine geit . mit deme wîzeme gesinde .
 43,15 dâ en mac nieman gevolgen wan die megede aleine .
 43,16 die an sêlen inde an lîbe sint behalten reine .
 43,17 dis kôr singet irem briutegumen einen niuwen sanc .
 43,18 sô sûeze . sô hôh inde lanc .
 43,19 stætlicliche . gelustliche . sunder wanc .
 43,20 den sunder die megede niet engein heilige en gesanc .
 43,21 disen kôr rihtet die sûeze keiserinne .
 43,22 si leitet den tanz si is vorsengerinne .
 43,23 ire stimme is sô sûeze sô sûeze .
 43,24 gip sûeze muoter daz ich dich schiere hoeren müeze .
 43,25 sô singet nâh dê kôr sûeze inde reine .
 43,26 inde volgent der sengerinnen algemeine .
 43,27 si singent in sîn herze deme lieben briutegumen .
 43,28 dâ si den selben sanc inne hânt genomen .
 43,29 sælic sint alle die die disen sanc sulen hoeren .
 43,30 sæliger sint si die mite singent in deme kôre .
 43,31 dâr aleine die reine megede zuo gehoeren .
 43,32 iedoch sal allermennischelîch singen sînen sanc .
 43,33 inde sal gote gelten sînen lop inde grôzen danc .
 43,34 waz vrôuweden sal dâ in den inviurigen herzen glimmen .
 43,35 also si hoerent die harpfen alsô maniger scheller stimmen
 43,36 man sal dâ singen daz lange daz sûeze alleluja .
 43,37 zuo allen strâzen verre inde nâhe .
 43,38 waz wonders iz sal wesen paschetac .
 43,39 also man zwei alleluja singen mac .
- 44,1 daz is . also beide lîchame inde sêle sal gevrôuwet werden .
 44,2 daz durch got riuwic was in diser erden .
 44,3 dâ sal man gebrûchen offenbâre .
 44,4 den sûezen Jêsus den wir hier ûf deme altære .
 44,5 in des brôtes inte des wînes formen entvein .
 44,6 alsô lange also wir in diseme vleische gein .
 44,7 dâ sulen wir unsen küninc beschouwen in sîner zierheite .
 44,8 des wir in diser diusternisse sô lange beiten .
 44,9 hier liget aller der vrôuweden ein ende .
 44,10 der wir warten in disen benden .
 44,11 want unse sin en mac niet here kumen .
 44,12 wan zuo deme vatere . inde zuo deme sune .
 44,13 inde zuo deme heiligeme geiste .
 44,14 dâ liget unse vrôuwede allermeist .
 44,15 si liget ouch dâ algare .
 44,16 dê sûeze got hê helfe uns dare .
 44,17 dâ hê selbe unse ougen müeze erliuhten .
 44,18 inde sich selben setzen in unses herzen liuhte .
 44,19 daz wir iemer müezen schînen .
 44,20 van ime . vore ime . under den sînen .

- 44,21 hilf uns hêre daz wir dare zuo der stat gehoeren .
 44,22 dâ wir dich sêze küninc sulen sien inde hoeren .
 44,23 dâ uns die grôze sælicheit sal geschien .
 44,24 daz wir dich heimeîchere wan die engele sien .
 44,25 want dû bis nâhere sippe unser natûren .
 44,26 danne der engelischen krêatiuren .
 44,27 want dû bis unse hêre inde unse bruoder
 44,28 van des halben dîner sæliger muoter .
 44,29 wir sulen unse mennischheit wêrlîche an dir bekennen .
 44,30 want wir dich wêrlîche got inde mennische nennen .
 44,31 dit is die sêze heimeîchheit .
 44,32 die wir sulen haben zuo dîner mennischheit .
 44,33 die engeine andere krêatiure hân en mac .
 44,34 ô wê sal iemer kumen dê sælige tac .
 44,35 daz ich dich sêze buole sule gesien .
 44,36 inde êwelîche an dîner umbehelungen lien .
 44,37 inde dîner sêzer küssingen gesatet werden .
 44,38 minnesame lamp . leitære der wîzer herten .
 44,39 dîn ruch sal alle balsame verwinnen .
 44,40 a hâ waz gerungen sal hê machen dâ enbinnen .
- 45,1 in den reinen herzen . in den wîsen sinnen .
 45,2 der sæliger briute . dîner küniginnen .
 45,3 also si kument in der wurze kamere .
 45,4 in dîn herze . sêze briutegume inde hêre .
 45,5 die minne sal dâ nemen oberhant .
 45,6 die vorhte sal dâ werden umbe gewant .
 45,7 man sal dâ vroelîche gân zuo dîner hant .
 45,8 in dîn milte herze sêze heilant .
 45,9 dîne stimme sal man dâ hoeren alsô vroelîche .
 45,10 daz ire noch engel noch mennische en gelîche .
 45,11 waz man gehoeren mac is eine krancheit
 45,12 wider dîner stimmen sêze wîsheit .
 45,13 wan dîne stimme sal sprechen in allen die dâ sîn .
 45,14 in allen die dâ schînent sal man sien dînen schîn .
 45,15 dâ sal ervüllet werden daz an deme vünften blate gebrach .
 45,16 want dîner güete sal dâ gelîchen dîn smach .
 45,17 dû bis dê selbe hier bedeket ûf deme altære .
 45,18 daz dû bis in deme himele offenbâre .
 45,19 wan wir en mügen niet gesmachen der grôzer sêzicheite .
 45,20 die uns dâ sal smachen nâh dîner milticheite .
 45,21 sêze Jêsus geruoche uns hier bewaren .
 45,22 daz wir zuo dir dare müezen varen .
 45,23 dâ wir dich den lebigen brunnen
 45,24 sien . mit deme êwigen liechte burnen .
 45,25 want dû bis dê brunne dâ daz licht inne . springet
 45,26 also uns dê sêze salme singet .
 45,27 in diseme liehteme brunnen sulen wir alle herzen beschouwen .

- 45,28 beide hêren inde vrouwen .
45,29 der wir nû an zwîvele sîn .
45,30 weiz got si werdent uns dâ alle schîn .
45,31 wê allermeist an unser minnen tuge .
45,32 ô wê wê unsen tumben wân hier betrûge .
45,33 want sôwaz ich minnen daz is mîn .
45,34 sô wir an der liute herzen sien .
45,35 alhier ane sprich van den bâgen .
45,36 wir haben über unse maht gesprochen .
45,37 inde unsen munt zuo deme himele entlochen .
- 46,1 wir müezen aber her nider stîgen .
46,2 inde zuo der erden . mit der liljen bluomen nîgen .
46,3 daz die hôh bluome nîget zuo der erden .
46,4 dâ mite sal uns bezeichnenet werden .
46,5 daz dû in dîneme herzen iemer destê ôtmüetiger sîs
46,6 sô dû der tugende hôchheit mêr an dir weist .
46,7 sôwê tugende âne ôtmüetigheit zesamene leget .
46,8 hê teit alse dê dê pulver wider den wint treget .
46,9 des guoten morteres gelîchenisse . hât die ôtmüetigheit .
46,10 want si daz gezimbere der tugende zesamene hangen teit .
46,11 sô daz gezimbere mêre wære .
46,12 iz zerviele âne den mortere .
46,13 die ôtmüetigheit die tugenden binden sal
46,14 ob si sint gewisse der sêlen val .
46,15 want die angestlîche stolzheit liget iemer in den lâgen .
46,16 daz si den guoten mane dê sich sîner gûeten bâget .
46,17 des bâges stric is angestlich .
46,18 hê is sô verborgen sô heimelich .
46,19 hê kumet selten in iemannes muot .
46,20 hê en vûnte dâ inne sunderlich guot .
46,21 sô zîuhet hê sînen stric dê is verstricket
46,22 dê ime entvliuhet dê is rehte sælic .
46,23 der êrste stranc is . daz der mennische wære .
46,24 daz ime got sînes guotes niet en lêhene .
46,25 mit deme stricke sint alle die gevangen .
46,26 die gote niet en willent danken .
46,27 des guotes daz hê in hât gegeben .
46,28 alse si van in selben leben .
46,29 nochdan van deme wereltlîcheme guote .
46,30 tuont si daz in is ze muote
46,31 inde sprechen “dît is mîn eigen inde mîn erbe .
46,32 ich sal iz gebrûchen biz ich sterben .
46,33 ich sal dâr mite tuon inde lâzen .
46,34 nâh mînen willen setzen inde sâzen .
46,35 ich en erkennen hier ane niemanne engeine hêrschaf .
46,36 daz mir mîn vater van rehteme erbe gap .”
46,37 dâr zuo antwürten ich dir mit wârheite .

- 46,38 daz dîn eine strenge rechenunge beite .
- 47,1 dâ dû muost rehte rechenunge geben .
47,2 alles des daz dû genomen hebes .
47,3 ein kleine ort en wirdet dir niet gelâzen .
47,4 dû en müezes iz wider geben mit rehter mâzen .
47,5 sô salt dû bekennen wes daz guot wære .
47,6 des dû ûf ertrîche hiezes hêre .
47,7 daz selbe sprechen ich van deme guote der sêlen inde lîbes .
47,8 want iz muoz allez under einer rechenungen belîben .
47,9 der ander stric is . daz der mennische prüevet sîne waletât .
47,10 inde dâr ûf leget sôwaz hê guotes hât .
47,11 dise willent gote benemen sîne genâde .
47,12 dê vergebenes gibet alle sîne gâbe .
47,13 der dritte stranc geit ûf geistlîche liute allermeist .
47,14 die wænent daz si aleine haben den heiligen geist .
47,15 inde versmæhent andere liute die süntic sint .
47,16 dâr zuo trîbet si der stolzheite wint .
47,17 der vierde stranc is alse si wænent daz haben
47,18 des aneginne nie an in en wart erhaben .
47,19 dere ougen sint des stüppes des stolzen bâges sô vol .
47,20 daz si an ireme wâne worden sint alsô tol .
47,21 wan dise hôh stricke betriuget die ôtmüetigheit .
47,22 die alle wege sicherlîche bî der erden geit .
47,23 alhier sprich van den gelen bluomen der liljen
47,24 die bluome die uns die minne bezeichnenet si is wîz
47,25 daz solen wir bilîche wesen . haben wir es vlîz .
47,26 want waz mac vore gotes ougen sô schoene sîn .
47,27 inde sô reine alse der minnen schîn .
47,28 dâr umbe merket der wîsheite wort mit sinnen .
47,29 “ich bin” sprichet si “muoter der schoener minnen .”
47,30 iz sint andere minnen die en sint niet schoene .
47,31 die sint verre van diseme lobe . inde van deme lône .
47,32 eteslîche liute minnent den schatz . inde die êre .
47,33 eteslîche des vleisches gelust . iz sint allez irrære .
47,34 want ire minne kumet van grôzer tumpheite .
47,35 die schoene minne kumet van der wîsheite .
47,36 got is die schoene minne inde die reine .
47,37 minne dise minne sunderlîche . inde aleine .
- 48,1 dise minne sal dich geweren
48,2 alles des dîn herze mac begeren .
48,3 sich an diser werelte bluome .
48,4 manic hêrschaf . mit deme rîchetuome .
48,5 sich daz mere inde die wazzer alse samen .
48,6 dâ en is niet ane behalben den namen .
48,7 iz dunket si ieteswaz sîn die arme blinden .
48,8 ez sal si wole erværen alse si die wârheit sulen bevinden .

48,9 ganc hoere inde merke des himeles lûtericheit .
 48,10 hê is schoene daz is diu wârheit .
 48,11 wane aldâ en sal dîne minne niet belîben .
 48,12 ganc noch vûrebaz zuo deme êwigeme lîbe .
 48,13 dunkent dich dise geschefnisse schoene inde guot .
 48,14 kêre mit vlîze an iren schepfære dînen muot .
 48,15 want dâ salt dû vinden die obersten hêrheit .
 48,16 die sîezeste wolegelust . die unzergancliche rîchheit .
 48,17 an den salt dû dîne minne wenden .
 48,18 an deme salt dû dîne minne enden .
 48,19 durch der schoener minnen ende .
 48,20 salt dû minnen sunder ende .
 48,21 want ich en mac dîne gerunge niet hôhere brengen .
 48,22 dâr dû dîne minne salt lengen .
 48,23 iz is guot daz dû an deme ende sunder ende belîbes .
 48,24 an deme kûninge des êwigen lîbes .
 48,25 alhier sprich van der liuten minnen
 48,26 wir haben geschriben ein lûtzel van der gotes minnen .
 48,27 daz dû zuo unser minne geben woltes unsen kranken sinnen .
 48,28 wir hân gesprochen also wir mohten niet also wir solten .
 48,29 also wir kunden . niet also wir wolten
 48,30 nû müezen wir volgen der materjen .
 48,31 die wir bestanten haben van der liljen .
 48,32 inde van den gelen bluomen sprechen .
 48,33 die dû sîs in den wîzen bluomen stechen .
 48,34 die gelen bluomen mügen uns die minne bezeichnen .
 48,35 die wir unseme ebenkristenen sulen reichen .
 48,36 die gotes minne en mac sunder dise niet bestân .
 48,37 dê got minnet hê muoz ouch die minne zuo sîneme nâhesten hân .

49,1 unse nâhesten sint alle die liute .
 49,2 ich en verwerfen noch heidenen noch juden
 49,3 want wir sulen in allen des gunnen .
 49,4 daz si erliuhtet werden van der êwiger sunnen .
 49,5 doch sulen wir grôz bescheidenisse haben .
 49,6 zuo weme wir allermeist minnen sulen tragen .
 49,7 des müeze uns dê guote meister bescheiden .
 49,8 die uns zuo disen worten . wolte leiten
 49,9 “den man âne mâze minnen sal daz is got .
 49,10 want daz wir in minnen daz gebiutet daz êrste gebot .
 49,11 dâr nâh salt dû dich selben minnen .”
 49,12 ô wê wie lûtzel der is die sich des versinnen .
 49,13 want sich selben en minnet nieman .
 49,14 wan dê sîner sêlen ze vorderst guotes gan
 49,15 inde dâr nâh sînen lîchamen alsô minnet
 49,16 daz iz die sêle niet en verwinnet .
 49,17 nû merke ob dû iemanne müges vinden
 49,18 dê wider sîne sêle arbeite unde arbeite sînen kinden .

- 49,19 wie hê in gewinne grôz wereltliche erbe .
 49,20 sô hê sîne sêle van deme himele enterbe .
 49,21 dit sint die jene die wuocherent si ne wizzen weme .
 49,22 alse si sterbent si en wizzen wê daz guot neme .
 49,23 der prophête sprichet "si sulent vremeden liuten lâzen ."
- 49,24 dit wort hât jâmers vile ûzer der mâzen .
 49,25 want wir müezen daz vernemen
 49,26 wie unse kindere die unse erbe müezen nemen .
 49,27 wie si uns iemer vremede mügen werden .
 49,28 die uns sô liep sô lange sint gewesen .
 49,29 hine abe willen ich dich kurzliche bescheiden .
 49,30 want ich willen dich an dich selben leiten .
 49,31 inde lâzen ez zuo dînes selbes urteile .
 49,32 ob ich unwâr sage an enigeme teile .
 49,33 sich waz dû dînen altvorderen gebes van dîneme erbe .
 49,34 des selben salt dû wartente sîn van dîneme erben .
 49,35 inde lîhte michel min .
 49,36 dâr nâh daz hê kêren sal sînen sin .
 49,37 alse dû dînen vlîz kêres an dîne kint .
 49,38 alsô sulen dîne kindere an ire kint .
- 50,1 inde alse vremede alse dû dîner vorderen sêlen bis .
 50,2 alsô sulen dir dîne erben des sîs gewis .
 50,3 inde daz wizzen alle die ire kint mit süntelicheme guote erbent .
 50,4 daz si beide ire sêle inte der erben sêle sterben .
 50,5 want sôwê sich weiz an boeseme guote wesen .
 50,6 hê muoz iz widere geben . willt hê genesen .
 50,7 dit sal weren an den tûsendigsten erben .
 50,8 dê ecker wizzen mac daz hê besizet unreht erbe .
 50,9 her umbe die sich minner minnent danne ire kint .
 50,10 si sint vile kindisch . inde vile blint .
 50,11 wante willen wir die lûtere wârheit sprechen .
 50,12 si en minnent die niet die si zuo der hellen brengen .
 50,13 want sôwê deme anderen nimet sîner sêlen êre .
 50,14 hê is sîn tôtvîant . hê hazzet in sêre
 50,15 want die sêle is bezzere danne einige wereltliche habe .
 50,16 die vile kurzliche muoz ein ende haben .
 50,17 want entweder die habe begibet dich sô dû nochdan beheltes daz leben .
 50,18 ob dû müezes die habe an dîneme snellen tôde begeben .
 50,19 danne wirdet iz dir machente jâmer inde riuwen .
 50,20 daz jâmerliche bier daz dû lebende hâs gebrûwen .
 50,21 dû en maht iz niemer verdöuwen .
 50,22 tumben mennische trinc wîn dê teit dich vröuwen .
 50,23 zuo dîneme biere is boese grûz gemenget .
 50,24 die dîne sêle zuo grôzen noeten brenget .
 50,25 dîn bier daz dû briuwes is wereltlich gewerp .
 50,26 want iz des hebels der minnen niet en hât dâr umbe belîbet iz derp .
 50,27 daz quît iz en gehoeret zuo deme himelischen tische niet .

- 50,28 man trinket dâ ecker tranc dê vrôuwede giet .
50,29 die sich hier lâzent in deme keltere des widermuotes drücken .
50,30 die hier verdultic sint in wereltlîcheme ungelücke .
50,31 die sulen dâ der vrûhte gevrôuwet werden .
50,32 die si mit iren henden winnent hier an diser erden .
50,33 dâr umbe râten ich ê dû beginnes sterben .
50,34 arbeite gernere vûre dich selben . wan vûre dîne erben .
50,35 des dû dir selbeme teis . des hâs dû sicherheit .
50,36 an dînen erben belîbet grôze ungewisheit .
50,37 want ire leben dicke missegeit .
- 51,1 is nû lîhte ieman dê rehte minne zuo sînen erben halte .
51,2 daz hê durch si wider sîne sêle niet en behalte .
51,3 vile kûme salt dû iemanne vinden .
51,4 dê sîn vleisch wille nâh der minnen rehte binden .
51,5 inde teit dô der sêlen inde . des geistes lêrunge volgen .
51,6 inde den geist nâh deme vleische niet en kêre .
51,7 hier verkêrent si die minne alle die ireme vleische sô sêre schônent .
51,8 daz si ime sîner stolzheite niet en lônent .
51,9 wane si minnent iz alze sêre .
51,10 inde volgent si ime sôwâ iz sich hine kêre .
51,11 dise minne is gekêret unrehte .
51,12 want die sêle sal man minnen mêr ze rehte .
51,13 dâr nâh sal man den lîchame an der minnen sâzen .
51,14 daz man ime an der narungen gebe guote mâze .
51,15 alsô daz iz sich wider den geist niet en erhebe .
51,16 inde daz iz zuo gotes dieneste gerehte lebe .
51,17 sûeze got dû dâ alle dinc geschaffen hâs mit mâzen
51,18 dû mûezes mich an diser minnen alsô sâzen .
51,19 daz ich alle übereinzicheit mûeze lâzen .
51,20 daz ich zuo dir mûeze kumen mit der enger strâzen .
51,21 sôwê weiz wie hê sich selben sule minnen .
51,22 dê is genuoc gelêrt an sînes nâhesten minnen .
51,23 want daz ander gebot lêret dich .
51,24 daz ein iewelich sînen nâhesten minne alse sich .
51,25 daz quît dû salt zuo ime die selbe gunst tragen .
51,26 die dû zuo dir selber salt ze rehte haben .
51,27 daz is die gunst namelîche .
51,28 daz dû ime des gunnes vlîzlîche .
51,29 sôwâz in vûrderen mac zuo deme himelrîche .
51,30 wan iz sîn noch andere minnen die man zuo den nâhesten treget .
51,31 die manic tump mennische ûf dit gebot leget .
51,32 sô hê sprichet “ich tuon gotes gebot .
51,33 ich minnen mînen nâhesten daz gebiutet got .”
51,34 hier bitten ich dich daz dû dînen sin willes mit vlîze zuo kêren .
51,35 want wir willen got bitten daz hê uns wille lêren .
51,36 diser minnen eteslich nütze underscheit .
51,37 die manigen verleitet . inde hât verleit

- 52,1 die minne die man zuo den liuten pfliget kêren .
 52,2 daz si viervaltic sî mûgen wir bewæren .
 52,3 die êreſte ſi is ſô sûber guot inde geiſtlich .
 52,4 die lezzeste is al sûr boese inde vleischlich .
 52,5 enzwûſchen diſen zwein ſint andere zwâ .
 52,6 die ſalt dû mit vlîze merken her nâh .
 52,7 der zweier minnen eine kumet van natûren .
 52,8 die die liute teit an der minnen dûren
 52,9 die andere machet einer hande heimelichheit .
 52,10 der nû vile in der werelte umbe geit .
 52,11 nû kêren wir die wort zuo der êreſter minnen .
 52,12 want die ſal uns allermeiſt ligen an den ſinnen .
 52,13 diſe minne ſi is algare . geiſtlich .
 52,14 zuo diſer minnen is gebunden ein iewelich .
 52,15 dê an deme gebote niet en wilſt erkalten .
 52,16 daz got wilſt uns zuo unſeme næheſten behalten
 52,17 nû ſien wir waz geiſtlîche minne ſî .
 52,18 want die ander minnen ſi velschent ſi
 52,19 daz ſagen ich kurzlîche alſe ich iz vernemen .
 52,20 geiſtlîche minne treges zuo deme .
 52,21 zuo des geiſte dû treges ſôgetâne gerunge .
 52,22 daz dû woltes daz ime aleine an den ſachen wole gelûnge .
 52,23 van den ſînes geiſtes ſælîcheit ſprûnge .
 52,24 kûme mac man diſe minne vollîche gerûeren . want die heimelîche minne
 pfliget
 52,25 hê ſich zuo diſer minnen erhebet .
 52,26 inde wirdet ire dicke alsô gelîch .
 52,27 daz hê vile ſælîc ſal ſîn inde ſinnic .
 52,28 dê ſi wole ſal undeſcheiden .
 52,29 ſô grôze gerunge liget an in beiden .
 52,30 inde die gerungen ſint aber ſô gelîch .
 52,31 daz ire undeſcheit en is niet gelîch .
 52,32 wan die minne die ſich recket an den geiſt
 52,33 ſi is umbe den geiſt ſorcsam allermeiſt .
 52,34 ſi vûrhtet die ſtricke die deme geiſte werdent gelaht .
 52,35 mit den hê dicke wirdet zuo den ſûnden brâht .

 53,1 wereltlîchen ſchaden inde des lîbes ſiuchede .
 53,2 vûrhtet ſi lûtzal . want ſi machent die tugende .
 53,3 wan die heimelîche minne ſi hât umbe diſe dinc grôze vorhte .
 53,4 daz dê vriunt beſwæret ſule werden mit werken ob mit Worten .
 53,5 inde daz hê ſiuchede inde riuwe ſule tragen .
 53,6 an diſe dinc inde diſer gelîche leget ſi ire klagen .
 53,7 dâr umbe machet ſi daz herze dicke swâr .
 53,8 die iz beſuoht habent ſi wizzen daz wole daz ich ſprechen wâr .
 53,9 alſus getânen angeſt habent ouch die geiſtlîche gemuote .
 53,10 umbe die die ſi geiſtlîche minnent umbe ire tugende .

- 53,11 wan doch an disen gedenken is ein schoene underscheit .
53,12 want die heimelîche minne vûrhtet des vleisches leit .
53,13 inde die geistlîche minne vûrhtet daz der sêlen vrume .
53,14 mit der ungedult mûge werden deme vriunde benomen .
53,15 wan die hoffenunge is der geistlîcher minnen baz bereit
53,16 danne si sî der minnen die kumet van der heimelichheit .
53,17 ouch kêret sich die eine mêr an die sachen .
53,18 die man mit den ûzerlîchen sinnen mac gereichen .
53,19 si gelûstet understunten baz des vleisches schoenheite .
53,20 danne des geistes gesuntheite .
53,21 si suochet mêr wereltlîche êre . inde rîchheit .
53,22 danne an einem armen der sêlen sælicheit .
53,23 si willt sich an die kêren die haben bûrge inde lant .
53,24 die armen si sint ire unbekant .
53,25 doch en sprechen ich niet daz man die rîchen niet en sule minnen .
53,26 man sal . alsô daz die rîchheit niet en sî daz aneginne .
53,27 ich willen nochdan mêr minnen einen armen des geist ich grôzer haben .
53,28 danne einen wereltarmen dê gerne wolte vile haben
53,29 man sal got in beiden halben minnen
53,30 ein iewelich gebe urteil van sinnen .
53,31 guot is die minne die kumet van natûren .
53,32 wane en gibet ire die geistlîche niet ire stiure .
53,33 si wirdet vleischlich inde wirdet ein haz .
53,34 daz willen ich diuten ein lûtzel baz .
53,35 daz dû dîne kindelîn minnes daz is guot .
53,36 want dâr zuo twinget die natûre dînen muot .
53,37 wane wilt dû si ecker nâh deme vleische ziehen .
53,38 inde en wilt dû den geist niet ane sien .
- 54,1 dû salt an in sien dînen unwillen .
54,2 want dû si niet en zûges nâh gotes willen .
54,3 inde dû muost ire sünden mit in tragen .
54,4 inde in den pînen mit in haben .
54,5 want daz sulen wizzen alle die den got kindere hât verliuwen .
54,6 daz si die sulen ziehen mit alsô grôzen triuwen .
54,7 also si gote willen antwûrte vûre ire sêlen geben .
54,8 her nâh berihten irere kindere leben .
54,9 inde vlîzigen sich selben . daz si alsô leben .
54,10 daz si iren kinderen engein boese bilede en geben .
54,11 noch en schônen in niet ob si ire leben ûbele ane vâhent .
54,12 inde ob si ûzer gotes wege geint .
54,13 want die minne si is wærlîche ein haz .
54,14 die den mennischen machet der sünden vaz .
54,15 inde dê hazzet sînen sun sprichet dê wîse man .
54,16 dê ime der ruoten niet envollen gegeben en kan .
54,17 mit deme sûren inde mit deme sîezen .
54,18 sal man den boesen willen bûezen .
54,19 inde rehte geleiten der kindere vuoze .

54,20 daz si sich vore den sünden behüeten müezen .
 54,21 in der natûren minnen sich ouch man inde wîp .
 54,22 want alsô got sprichet si zwei sint al ein lîp .
 54,23 ei wie grôze minne inde vröuwede is dâ .
 54,24 dâ beide man inde wîp volgent der geistlîcher minnen nâh .
 54,25 inde lebent sô einmuotlîche samen .
 54,26 daz si habent einen geist . alse si habent einen lîchamen .
 54,27 want daz willen ich sagen den vrouwen allen .
 54,28 daz si sulen iren vlîz hân wie si iren mannen wole bevallen .
 54,29 iz en sî grôzlîche inde offenbâre wider got .
 54,30 dâ sulen si ime halten gotes gebot .
 54,31 nochdan sal man den mannen volgen under stunten .
 54,32 daz si niet en vallen in mêrre sünden .
 54,33 hier hoeret zuo grôze bescheidenheit .
 54,34 die uns ze sagenne wære ze lanc inde ze breit .
 54,35 van gare vleischlîcher minnen en willen ich niet sagen .
 54,36 want man sal si schiuhen . inde ire volgære klagen .
 54,37 want si îlent in die abysse .
 54,38 in die êwige vinsternisse .

55,1 alhier ane sprich van den werken der minnen
 55,2 nû gein wir wider in unse materjen .
 55,3 inde vollesprechen die gele bluomen der liljen .
 55,4 die uns ein zeichen sint der minnen .
 55,5 dâ wir nâh gote unse næhesten mite minnen .
 55,6 die sehs gele bluomen die dû enbinnen den wîzen sies stân .
 55,7 mit den salt dû sehs werc der barmherzicheite verstân .
 55,8 mit den wir unsen næhesten sulen ze staten kumen .
 55,9 inde wirken beide iren inde unsen vrumen .
 55,10 dise barmherzicheit en hât nieman .
 55,11 dê sînen næhesten noch niet minnen en kan .
 55,12 want daz herze muoz allerêrest van der minnen entwarmen .
 55,13 daz si sich über sînen næhesten sal erbarmen .
 55,14 dâr umbe die werc der minnen inde der barmherzicheite .
 55,15 si sint al ein mit engeineme underscheide .
 55,16 welich dise sehs werc sîn der barmherzicheite .
 55,17 wolte uns unse heilant selbe bescheiden .
 55,18 daz êreste is daz man dem hungerigeme sal die spîse geben .
 55,19 daz ander is daz man den durstigen sal mit deme tranke laben .
 55,20 daz dritte is daz man die geste sal zuo der herbergen leiten .
 55,21 daz vierde is daz man sal den nacheten kleiden
 55,22 daz vünfte is daz man zuo den siechen geit .
 55,23 daz sehste is daz man den gevangenen bî steit .
 55,24 an disen werken is sô grôze werdicheit .
 55,25 daz sôweme man si durch gotes minne teit .
 55,26 got sprichet iz sî ime selbeme getân .
 55,27 alse hê selbe wolte an deme evangeliô sân .
 55,28 alse des mennischen sun gesitzet zuo deme urteile .

- 55,29 hê sal alle die liute in zwâ scharen teilen .
55,30 die guoten sal hê setzen zuo der zeswer hant .
55,31 die boesen sulen zuo der lertzere werden gewant .
55,32 sô sal der küninc sprechen
55,33 zuo den . die steint zuo sîner zeswen .
55,34 “kumet gebenedîeten mînes vateres .
55,35 inde entvâhet daz rîche algater .
55,36 daz iuch van aneginne was bereit .
55,37 vroeliche sulet ir dâr in werden geleit .
- 56,1 want dô mich hungerte ir gâbet mir ezzen .
56,2 dô mich dûrste ir gâbet mir trinken
56,3 dô ich gast was ich wart van iuch entvangen
56,4 dô ich nachtet was . ich wart mit iuweren kleideren behangen .
56,5 dô ich siech was inde gefangen .
56,6 ir quâmet zuo mir . mich ze troestenne gegangen .”
56,7 sô vrôuwent die gerehten sich .
56,8 inde sprechent “hêre wanne sâgen wir dich
56,9 daz wir dir disen dienst erbuten .”
56,10 sô antwertet der küninc den guoten .
56,11 “sôwâr ir iz tâtet mînen minnesten .
56,12 dâ wâret ir an mîneme dieneste .”
56,13 sô kêret hê sich zuo den die zuo der linker hant sulen stân .
56,14 inde heizet si in daz êwige viur gân .
56,15 want si sich niet en hatten zuo deme rîche bereit .
56,16 mit den werken der barmherzicheit .
56,17 dâ mite si iren næhesten solten haben getrôst .
56,18 obe si sich van den pînen wolten haben gelôst .
56,19 nû merke diser werke werdicheit .
56,20 den aleinen der himel is bereit .
56,21 die aleine den lop sulen haben .
56,22 inde aleine sulen krône tragen .
56,23 in des grôzen urteiles tage .
56,24 wâr umbe is dit wan daz dise sachen .
56,25 uns vollekomen an der minnen machen .
56,26 inde der minnen zeichen tragen .
56,27 die wir zuo den næhesten sulen haben .
56,28 want alse uns lêret dê gotes minnære .
56,29 Johannes dê sûeze lêrære .
56,30 “sôwê sînen bruoder sît daz hê in noeten steit .
56,31 inde ime niet en hilfet mit der barmherzicheit .
56,32 wie mac gotes minne in ime sîn .
56,33 die mit den werken sich niet en machet schîn .”
56,34 an diseme worte mûgen wir daz wole merken .
56,35 daz sôwê die barmherzicheit niet en hât an den werken .
56,36 die bezeichent sint an den sehs gelen bluomen .
56,37 hê en is noch niet zuo gotes minnen kumen .

- 57,1 want gotes minne en mac nieman haben .
 57,2 hê en müeze ouch minne zuo allen liuten tragen .
 57,3 minnes dû alle die liute . also unse hêre sente Johanne .
 57,4 inde treges dû unminne zuo eineme manne .
 57,5 dû en hâs der minnen niergen engein teil .
 57,6 daz dir iemer dannen abe müge kumen heil .
 57,7 hier sprich ane van der minnen zuo den liuten
 57,8 daz willen ich dich wîsen mit gotes genâden .
 57,9 got müeze uns daz bezziste wîsen inde râten .
 57,10 Jêsus Christus hât ein lîchame daz hê van sîner muoter lîbe nam
 57,11 dô hê durch unse minne in dise werelt quam .
 57,12 hê hât ouch einen geistlîchen lîchamen .
 57,13 daz is hê inde di kristenheit alsamen .
 57,14 daz houbet van diseme lîchame is dê guote Jêsus aleine .
 57,15 der ander lîchame is die kristenheit algemeine .
 57,16 ein iewelich kristenmennische is ein lit an diseme lîchamen .
 57,17 also uns lêret sente Paulus mit namen .
 57,18 nû sage . ob ieman wolte dîn houbet êren .
 57,19 inde wolte dînen vuoz ob dîne hant beswæren .
 57,20 woltes dû dich iet an sîne minne kêren .
 57,21 ob dunket dich daz hê dîn vîant wære .
 57,22 setzte hê dir ûf dîn houbet eine krône guldîn inde van edelen gesteine .
 57,23 inde entvengete ein viur an dîneme vuoze . ob dînem beine .
 57,24 ich wænen dû soltes ime lützel danken sîner krônen .
 57,25 sô hê dîneme beine niet en wolte schônen .
 57,26 rehte alsus is iz an Jêsus geistlîcheme lîchamen .
 57,27 sôwê in willt minnen . hê muoz in minnen alsamen .
 57,28 want sôwê hazzet einic sîner lidere .
 57,29 hê mac niet sîn des houbetes minnære .
 57,30 dû küsses mich alze vergebenes vüre mînen munt .
 57,31 wilt dû mich an eineme anderen lide machen wunt .
 57,32 wilt dû daz ich danke dir dîner minnen .
 57,33 dû muost mînen vinger also mîn houbet minnen .
 57,34 dit hân ich gesprochen umbe sôgetâne sachen .
 57,35 daz ich die minne müge gemeine machen .
 57,36 want die minne hât sô grôze breite .
 57,37 daz si niemanne van ire en willt gescheiden .
- 58,1 wan doch also dâ vore eines teiles steit .
 58,2 dise minne willt haben . grôz underscheit .
 58,3 daz wir wizzen zuo weme wir mêr minnen sulen tragen .
 58,4 alsô daz unse minne rehte reht habe .
 58,5 want sôweliche dinc niet en is redelich .
 58,6 sôwie guot iz sî . iz is unlobelich .
 58,7 dâr umbe willen ich mit kurzen worten .
 58,8 dir sagen der minnen orden .
 58,10 die sulen uns an der minnen allernæhest wesen .
 58,11 mit dere lêrungen wir sulen an der sêlen genesen .

- 58,12 daz sint die guote predigære .
58,13 inde andere gerechte lærære .
58,14 die uns mit der guoter lærunge wolten sterken .
58,15 an deme gelouben inde an guoten werken .
58,16 dâr nâh sulen wir die minnen alzehant .
58,17 die uns van der natûren sint bewant .
58,18 die natûre si sal uns selbe bescheiden schiere .
58,19 wie wir die minne sulen ordenieren .
58,20 ich wænen daz an diser minnen die kindere nemen oberhant .
58,21 iedoch mêr êren sal an vater inde an muoter werden gewant .
58,22 want daz man die ze vorderst êre .
58,23 gebiutet got unse schepfære . alhier ane sprich van den ordenen der minnen
58,24 dâr nâh geit die minne der guoter heimelichheite .
58,25 die wir allerêrest sulen an unse gesinde breiten .
58,26 en is die minne mit geistlicher minnen niet entvenget .
58,27 wie lihte si beide hêren . inde gesinde zuo pînen brenget .
58,28 want alsô meisteren die hêren ires gesindes leben .
58,29 alse si willen gote vûre si rede geben .
58,30 dâr nâh sulen wir unse nâhgebûre binden mit der minnen .
58,31 dâr nâh sulen wir unse lantliute minnen .
58,32 dâr nâh sulen wir minnen alle die an unseme gelouben sint .
58,33 ze jungeste sulen wir an allen liuten machen unse minne schîn .
58,34 want ob wir niet mêr en haben .
58,35 guoten willen sulen wir zuo allen liuten tragen .
58,36 alsô verre daz wir ouch unse vîande niet en vertriben .
58,37 willen wir mit deme guoteme Jêsu belîben .
- 59,1 dê ouch vûre sîne kriuzigære bat .
59,2 durch ire helfe . inde unse lærunge tete hê daz .
59,3 sôweme got der genâden gan .
59,4 dê is rehte ein vollekomen man .
59,5 want âne zwîvel hê is vriunt ouch anderere liuten .
59,6 dê sînen vîant minnet alsô got gebiutet .
59,7 inde dâr umbe sal hê tragen die êwige krône .
59,8 die den vollekomenen minnæren wirdet ze lône .
59,9 die houbet der sehs bluomen sint golde gelîch .
59,10 dâ mite vernim ire werdicheit . die is êwelich .
59,11 die silberîne stile tragen der guoter worte zeichen .
59,12 die dû den armen salt mit den almuosenen reichen .
59,13 dû salt ouch mit guoten Worten troesten ire armüete .
59,14 daz si iz vertragen mit senfteme gemüete .
59,15 sô is dîne almuosene zwivaltic worden .
59,16 an den werken . inde ouch an den Worten .
59,17 inde sô teis dû baz mit den Worten wan mit den werken .
59,18 alse die wort die sêle sterken .
59,19 hier sprich ane van der niuwer minnen
59,20 noch ich en mac gesprechen noch iz en mac nieman gehoeren .
59,21 allez daz zuo diser minnen gehoeret

- 59,22 wan wir sprechen daz wir mügen .
59,23 daz engeiner hande minne niet en tuge .
59,24 die geistliche minne en sî dâ mite .
59,25 want si minnet der sêlen vride .
59,26 dit is die minne van dere sente Paulus sprichet .
59,27 “dê sînen nêhesten minnet niet ime en gebrichet .
59,28 wande hê hât den êwen vollebrâht .
59,29 want aller der êwe hê is ûf die gebot gelaht .”
59,30 Johannes dê sunderliche minnære .
59,31 hê gibet uns ouch dise lêre .
59,32 die vile sêre mac die erværen .
59,33 die sich van diser minnen turren kêren .
59,34 hê sprichet “sôwê niet en minnet hê is tôt .
59,35 want hê versmæhet daz dê lebende got gebôt .”
59,36 inte dô dê guote Jêsus saz zuo der merungen .
59,37 van der minnen was alle sîne lêrunge .
- 60,1 inde sprach “dâ mite sal man iuch underkennen .
60,2 inde wie wærlîche sal man iuch mîne jungere nennen .
60,3 ob ir sunder einigen wandel .
60,4 die gewære minne hât under einander .
60,5 want ich gebieten iuch daz ir iuch enzwûschen minnet .
60,6 also ir wizzet daz ich iuch haben geminnet”
60,7 man en mac die minne niet envollen geloben .
60,8 wan daz is daz oberste an der minne lobe .
60,9 daz got die gewære minne is .
60,10 inde minnes dû daz dû in gote bis .
60,11 inde got hê is in dir .
60,12 hêrre . dise minne müeze iemer sîn in mir .
60,13 gip mir daz ich dich inde mînen nêhesten dâ mite .
60,14 minnen müeze mit alsô solicheme vriden .
60,15 daz ich mîne nêhesten in dir müeze minnen .
60,16 daz wir samen in dir belîben mit der minnen .
60,17 noch haben ich einer hande minne bevunden .
60,18 die mir noch niet wole en is entbunden .
60,19 die unbesuohten en sulen es geloben niet .
60,20 wan iedocho is iz dicke geschiet .
60,21 daz ein mennische hatte manic jâr sunderliche .
60,22 ein anderen geminnet inde heimeliche .
60,23 inde daz hê dâr nâh lîhte einen vremen sach .
60,24 wider den hê nie wort en gesprach .
60,25 inde daz sîne sêle zuo deme vremen geliche mêr wart gebunden .
60,26 in einer vile kurzer stunden .
60,27 wan si dâ vore wære zuo deme alten vriunde .
60,28 deme hê sô lange wole guotes gunde .
60,29 inde des hê hatte lange künde .
60,30 waz machet sô snelliche dise minne .
60,31 waz wandelet sô heimeliche des mennischen sinne .

- 60,32 hine abe wolte ich gerne hoeren sprechen einen wîseren man .
60,33 wan doch willen ich sagen daz ich van gotes genâden kan .
60,34 inde willen doch alle zît gehoeren eineme wîsen
60,35 dê mich iet bezzeres mac gewîsen .
60,36 ich wænen daz die natûre under stunten mache dise minne .
60,37 die man sô gæhelîche sunder heimelichheit mac gewinnen .
- 61,1 want alse zwêne mennischen die van einer natûren sint .
61,2 zuosamene kument inde sich undersient .
61,3 die natûre si zounet zehant stillîche ire maht .
61,4 inde bindet die herze die des niet en hatten gedâht .
61,5 an diser minnen warnen ich alle mîne vriunde .
61,6 want si en hât niet heiligen wec noch ende zuo allen stunt .
61,7 inde dâr umbe en sal man ire niet alse sêre verhängen .
61,8 wan man sal si mit deme breitele der bescheidenheite twengen .
61,9 daz si die gerunge niet en mûge ûzer deme rehten wege brengen .
61,10 daz vile lîhte geschiet willt man ire den breitel lengen .
61,11 hier sprich ane van der drîvalticheite
61,12 nâh langen umbegengen müezen wir doch daz ende suochen .
61,13 daz ende des wir aleines sulen ruochen .
61,14 daz ende des niemer ende en wirdet .
61,15 daz ende des nieman wîser entbiret .
61,16 daz über alle dinc is küninc inde wirt .
61,17 daz ende is die heilige drîvalticheit .
61,18 die alle dinc ervüllet inde umbeveit .
61,19 der bezeichenisse wir vunten an der drîeggehter bluomen .
61,20 die uns nû is ze sprechene zuo kumen .
61,21 dise bluome hât an der liljen die oberste stat .
61,22 daz vüeget wole . inde wole billich is daz .
61,23 want si treget zeichen der oberster drîvalticheite .
61,24 der nieman en genæket mit der werdicheite .
61,25 der drîvalticheite zeichen mûgen wir an der bluomen vinden .
61,26 obe die drîvalticheit . willt unses herzen ougen entbinden .
61,27 want die bluome hât ein houbet daz is drîeggeht .
61,28 dâ mite is bezeichent ein got dê is drîvaltic .
61,29 dise bluome sal daz houbet an der geistlicher liljen wesen .
61,30 want âne dit houbet en mac nieman genesen .
61,31 dâr umbe sint si alle tût an der sêlen .
61,32 die sich zuo diseme houbete niet en willen kêren .
61,33 inde si en gehoerent niet zuo des küniges hove .
61,34 die niet en tuont alle dinc zuo sîneme lobe .
61,35 daz sint alle die suochent ires selbes êre
61,36 inde sich an die werelte zierheit kêrent .
61,37 dise en habent des drîvaltigen houbetes niet
61,38 want si en sint niet liljen . wan si sint ein grüne riet .
- 62,1 daz ûzwentige schînet als iz eteswaz sî .
62,2 wante enbinnen wirdet sîne kranchheit schîn .

- 62,3 wan dare en kunnen die tumben ire ougen niet gekêren .
 62,4 die iemer starent nâh der wereltlîcher êren .
 62,5 sûeze got drîvaltîc an der einvaltîcheite .
 62,6 einvaltîc an der drîvaltîcheite . –
 62,7 geruoche unsen gedanc . wort . inde werc alsô geleiten .
 62,8 daz wir dîner êren aleine beiten .
 62,9 biz wir kumen zuo der weiden .
 62,10 dâ dû selbe bis unse hirte inde unse geleite .
 62,11 dâ wir dich selben inde in dir selben sulen weiden .
 62,12 alsô daz wir niemer van dir en gescheiden .
 62,13 waz hilfet iz daz man guote wort sprichet inde guote werc teit .
 62,14 dâ man iet anders suochet wan die goteheit .
 62,15 die den aleinen sal zuo lône werden .
 62,16 die aleine gotes êre suochent hier an der erden
 62,17 dâr umbe gip sûeze got daz wir alle dinc durch dîne êre tuon müezen .
 62,18 daz dû her nâh müezes unse armüete gebüezen .
 62,19 inde nâh diseme tôtlicheme lîbe willes vroelîche grüezen .
 62,20 die nû ligent inde weinent zuo dînen vuozen .
 62,21 nû is iz zît daz ich ime lop inde genâden gebe .
 62,22 van des genâden ich bin inde leben .
 62,23 dê mich alse ich wêrlîche mac gevüelen . an diser unkündiger arbeite niet
 en hât begeben .
 62,24 ich genâden dir Jêsu sûeze heilant .
 62,25 inde benedîen dich alle zît . inde nû alzehant .
 62,26 daz dû mir sô guotlîche hâs gereichet dîne hant .
 62,27 biz ich kumen bin über dit mere an daz lant .
 62,28 aller der lop dises werkes sal wêrlîche an dich werden gewant .
 62,29 ob ieman iet lobelîches hier ane vant .
 62,30 is hier iet anders . dâ is mîne kranchheit mite bekant .
 62,31 die ich tragen an diser vleischlîcher want .
 62,32 alsô lange sô mich twinget dis tôtlîche bant
 62,33 bizze ich kumen an daz heimelîche vaterlant .

 63,1 dâ daz êwige leben sal an mir nemen oberhant .
 63,2 dâ mich dê guote Jêsus umbevâhe mit sîner zeswer hant .
 63,3 haben ich iet gesprochen daz wider die zuht . obe wider den gelouben geit
 .
 63,4 daz ze bezzerenne bin ich alle wege bereit .
 63,5 an deme ich dit werc began daz wæres dû .
 63,6 an deme ich iz ouch enden . guote sûeze liebe . Jêsus .